

MANATU AOAQ: O LE ATUA MA SUIGA

MANATU TAIALA O FEPUARI: O SUIGA LELEI E MAI LE ATUA

E moni lava, ua na o lo tatou Atua na te faia suiga lelei mo o tatou tagata, pe afai na te silafia le mea tonu e tatau ona tatou ola ai.

ASO SA: 8 FEPUARI 2015 (ASO SA O TUPULAGA)

MATAUPU: UA FANAU SETU E SUI IĀ APELU.

SINI: Ia a’oa’o le vasega ina ia malamalama sa foa’i mai e le Atua le tama o Setu i le aiga o Atamu ma Eva, e avea ma sui o Apelu ua maliu.

TUSI FAITAU: Kenese 4: 1 – 8; 25 – 26 (mo le Faiaoga)
Kenese 4: 25 – 26 (mo le Vasega)

FESOASOANI MO FAIAOGA:

Tamaiti, o ai foi ulua’i tagata na faia e le Atua? Sa’o lelei, o Atamu ma Eva. E iloa la e se tasi, o ai igoa o le fanau a Atamu ma Eva? Ioe, o Kaino ma Apelu. O Kaino le ulumatua ae laitiiti le tama o Apelu. O se tasi aso, na fai ai taulaga a nei tama i le Alii. Sa silasila pe na talia e le Alii le taulaga a Apelu, ae le’i silasila i le taulaga a Kaino. O le pogai lena na ita ai loa Kaino, ma fasioti i si ona uso o Apelu.


Tamaiti, e ese le leaga o le tama o Kaino ma le mea na ia fai i si ona uso. O le tatou mataupu la o lenei Aso Sa, o le toe foa’i mai lea e le Atua o se isi tama i le aiga o Atamu ma Eva, e sui ia Apelu ua maliu.

Tamaiti, e mafai e le Atua ona faia suiga lelei ia i tatou ma o tatou aiga, pe afai e aafia i tatou i faanoanoaga. A lea ua ta’u mai e le tatou Tusi Faitau, ua toe fanaua e Eva lana tama tane. Ua faaigoa foi o ia o Setu, auā na faapea ia, ua tofia mai e le Atua ia te au le tasi tama, o le sui o Apelu. O le uiga foi lena o le igoa o Setu ‘tofia’ auā na tofia e le Alii o ia e fai ma sui o Apelu ua maliu. Sa matua Setu ma ia fanaua lona atalii e igoa ia Enosa.

Tamaiti, ua a’oa’o mai lenei tala ia i tatou, ina ia tatou iloa ai, e mafai e le Atua ona faia suiga lelei ia i tatou, tatou te fiafia ai. E le gata i lea, ae o i tatou foi le fanau, o meaalofa ma tofi ua foa’i mai e le Atua mo o tatou matua ma o tatou aiga. O lona uiga e tatau ona tatou usiusita’i i o tatou matua, ma ia fa’aaloalo foi i le Atua.

GALUEGA FAATINO: Faaigoa le ata

O le ata o i lalo, ua faailoa mai ai le aiga o uluai tagata i le lalolagi (Atamu ma Eva ma le la fanau) Tu’u le igoa sa’o i le avanoa ua saunia i lalo ifo o le pusa.



PESE: Nothing is impossible, when you put your trust in God.

TAULOTO: (A'oa'o i tamaiti le tauloto lea)

O Kaino o se tama faatamala
Fasioti Apelu ae lē agasala
Atamu ma Eva ua toe fiafia
Foa'i mai Setu e toe suia
Tamaiti ia outou ola fealofani
Alofa i le Alii ma so o se tasi

A'OA'OGA FOU:

1. Alofa i ou uso, tuafafine ma tuagane
2. Ia ola fealofani

TATALO:

Faafetai Tamā i lou alofa, auā ua toe amata a matou aoga Aso Sa o lenei tausaga fou.
Fesoasoani mai ina ia matou ola fealofani ma usiusita'i i o matou matua ma lau Afio. Amene.

ASO SA: 15 FEPUARI 2015

MATAUPU: E SUIA E LE ATUA MEA NA IA FAIA.

SINI: Ia a’oa’o le vasega ina ia malamalama, e pule toatasi le Atua i mea uma na Ia faia.

TUSI FAITAU: Kenese 6: 1 – 8 (mo le Faiaoga)
Kenese 6: 5 – 8 (mo le Vasega)

FESOASOANI MO FAIAOGA:

Tamaiti, o ai na faia le tagata? Sa’o lelei, o le Atua. A o ai la na faia meaola uma o lo o ola i le fogaeleele ma le sami? Ioe o le Atua. O mea uma lava o lo o i le lalolagi, na faia lava e le Atua. O lona uiga e pule le Atua i nei mea uma. Afai foi e finagalo le Atua e ave’ese ni isi mea ae suia i nisi mea fou, e faitalia lava o Ia, auā o mea na Ia faia.

O le tatou mataupu la o lenei Aso Sa – **E SUIA E LE ATUA MEA NA IA FAIA.**

Tamaiti, ina ua faatoateleina tagata i le fogaeleele, ua silasila atu le Alii, ua leaga tele lava i latou. Ua lē manatu tagata i ni mea lelei, ma ua lē manatu foi i le Alii, ae ua fiafia i le ola agasala. O aso uma ua na o le leaga lava e fiafia i ai tagata.

Sa silasila pea le Alii i nei amioga leaga a tagata, ona salamō ai lea o ia, ma ua tigā ai foi lona finagalo. Ua ia fetalai ane foi – ‘Ou te soloi’eseina i le fogaeleele tagata na ou faia, o tagata, ma manu vaefa, ma mea fetolofi, atoa ma manu felele; auā ua ou salamō ina ua na faia i latou! O lona uiga, ua finagalo le Alii e ave’ese tagata ma meaalofoa uma i le lalolagi, ae suia i nisi mea fou, auā ua leaga lava i latou i le agasala. Pau lava le tagata na finagalo le Atua ina ia faasaoina, ua na o Noa ma lona aiga auā o ia o se tamā amiotonu.

Tamaiti, o i tatou o tagata ma meaola uma o i le fogaeleele e pule ai lo tatou Alii, auā o Ia lava na Ia faia. Afai e silasila mai le Alii ua leaga ma lē tonu ala tatou te savavali ai, o lo o ia te Ia lava le pule e suia ai. O lona uiga e tatau ona tatou amio lelei, ona fiafia ma alofa mai ai lea o lo tatou Alii ia i tatou.

GALUEGA FAATINO: (Faatumu avanoa)

Faatumu avanoa o i le parakalafa i lalo, i upu ua tuuina atu: salamō, faia, soloi’eseina, finagalo, tigā, leaga, alofagia.

Na silafia e le Alii ua leaga tele tagata i le lalolagi. O o latou manatu, ua na o mea _____(1)_____ i taimi uma lava. O le pogai lea na _____(2)_____ ai le Alii i le tagata na ia _____(3)_____, ma ua _____(4)_____ ai foi lona _____(5)_____. Sa finagalo foi le Alii, ia _____(6)_____ tagata i le fogaeleele atoa ma meaola uma, vagana ai Noa, auā sa _____(7)_____ o ia e le Alii.

Tali: 1) leaga 2) salamō 3) faia 4) tigā
5) finagalo 6) soloieseina 7) alofagia.

PESE: A’oa’o le pese lea. Fati lava i le “O Noa na fau le vaa ma si ana samala”

Le lalolagi ua tumu i le agasala
Tagata fiafia fai o le leaga
Le Alii tafi ese manu ma tagata
Alofagia Noa, ia sao lava.

A'OA'OGA FOU:

1. E fiafia le Alii pe a tatou amio lelei.
2. Fiafia i matua ma le Atua.
3. E alofagia i tatou e tagata pe a amio lelei.

TATALO:

Le Alii e, ia e a'oa'o mai pea i matou, ina ia matou lafoa'i le olaga leaga, ae ia suia i mea lelei e te fiafia i ai. Amene.

ASO SA: 22 FEPUARI 2015

MATAUPU: UA SUIA LE IGOA O APERAMO.

SINI: Ia a’oa’o le vasega ina ia malamalama, o le Atua lava na toe faaigoa ia Aperamo o Aperaamo.

TUSI FAITAU: Kenese 17: 1 – 8 (mo le Faiaoga)
Kenese 17: 1 – 6 (mo le Vasega)

FESOASOANI MO FAIAOGA:

Tamaiti, o ai se isi o le tatou vasega e lua pe sili atu ni ona igoa? Lelei tele. E i ai isi tamaiti po o tagata matutua foi i o tatou aiga ma nuu e lua pe sili atu foi ona igoa. Ma e ui lava ina tele igoa, ae o le tagata lava e tasi.

O le mataupu la o lenei Aso Sa – “**UA SUIA LE IGOA O APERAMO.**” O ai foi le igoa o le āvā a Aperamo? Ioe o Sarai.

Ina ua iva sefulu ma le iva tausaga o le matua o Aperamo, sa fa’aali ai ia te ia le Alii. Sa ia faapea atu foi ia Aperamo – “O a’u o le Atua e ou le malosi uma lava (Almighty God), ia e savali i o’u luma, ma ia sa’o lau amio ...” Na fetalai atu foi le Atua ia Aperamo:- Ta te osia le feagaiga ma oe ..” O le Feagaiga tamaiti, o se mataupu ua malilie i ai ni tagata, ina ia tausia ma faamaoni i ai.

O le feagaiga la na faia e le Atua ma Aperamo, o le a avea ai Aperamo ma tupuga o nuu e tele i le lalolagi. Sa faapea foi ona faailoa atu e le Atua ia Aperamo, o le a lē toe valaauina o ia i le igoa Aperamo, ae o le a suia lona igoa ia Aperaamo, auā o le a avea o ia ma tupuga o nuu e tele. Tamaiti o le uiga foi lena o le igoa – Aperaamo, o le tupuga o nuu e tele, po o le tamā o le vao nuu.

O lona uiga o Aperaamo e tupuga mai ai ia Aperaamo tagata uma. O lenei foi feagaiga e tumau lava e faavavau pe afai e avea lava le Atua ma Alii i tagata i taimi uma. O le nuu foi o Kanana ua aumau ai Aperaamo, o le a fai lava lea ma foa’i mo Aperaamo ma lana fanau e faavavau.

Tamaiti, o faamanuiaga uma nei mai le Atua mo Aperaamo, ina ua Ia suia lona igoa mai ia Aperamo sa i ai le amataga.

O faamanuiaga foi e maua lava e Aperaamo pe afai e ola i le amiotonu a le Atua. O le a’oa’oga foi lea mo i tatou le fanau, e le taua pe fia ni igoa ua faaigoaina ai tatou e o tatou matua. O le mea pito sili ona taua, pe afai tatou te ola usiusita’i, faamaoni, alofa ma isi uiga lelei e tele, i lo tatou va ma le Atua, matua ma isi tagata i o tatou aiga, nuu ma le ekalesia. Afai ua le lelei la tatou amio, ua tataua nei ona suia, e fīafia mai ai le Atua ia i tatou.

GALUEGA FAATINO: Paso

Saili mai upu nei i totonu o le paso. O nisi upu e faitau faalava, o nisi e faitau mai lalo i luga, po o luga foi i lalo.

NUU, IGOA, FA’AALI, TUPUGA, VALAAUINA, FANAU, MALOSI, FEAGAIGA, APERAAMO, TAUSAGA, IVA, APERAMO

A	A	I	O	T	U	P	U	G	A
A	P	E	R	A	A	M	O	L	F
I	P	E	M	U	U	N	T	L	F
U	N	U	R	S	T	V	S	H	E
A	V	A	L	A	A	U	I	N	A
N	F	K	I	G	M	R	F	L	G
A	A	V	H	A	P	O	E	N	A
F	A	A	A	L	I	G	O	A	I
G	U	S	I	E	H	F	T	K	G
F	U	T	M	A	L	O	S	I	A

E mafai foi ona galulue faatasi le faiaoga ma tamaiti pe afai e le lava se taimi.

PESE: (1) E lelei le pese ua masani ai tamaiti – “Aperaamo le tamā, ma lana fanau”

(2) E mafai foi ona a’oa’o i tamaiti le tauloto pu’upu’u lea.

Aperaamo le tamā matua
 Sa faailoa i ai le Atua
 O oe e tupuga mai ai nuu e tele
 Ia e amio sa’o aua le fefe
 Le feagaiga ia manatua pea
 Pe a e alu i so o se mea.

A’OA’OGA FOU:

1. Faalogo ma usita’i i le Atua.
2. Ia lelei lau amio.
3. Faamaoni e manuia ai lou olaga.

TATALO:

Le Alii, fesoasoani mai ia i matou, ina ia ta’uleleia o matou igoa pe afai e suia o matou olaga i mea lelei mai lau afio. Ona o Iesu lo matou faaola, Amene.

MANATU TAIALA O MATI: IA TAUMAFAI PEA

O le ola taumafai ia maua se mea lelei, o se olaga taua tele mo i tatou le fanau. E le tatau ona tatou fiu gofie i faigata o le taumafai i lau aoga ma le tausia o matua. E tali mai lava le Alii i le tagata e taumafai ma faamoemoe ia te Ia.

ASO SA: 1 MATI 2015

MATAUPU: SAILI I LE ALII ONA MAUA LEA.

SINI: Ia a’oa’o le vasega ina ia malamalama, o le tagata taumafai e le tatau ona fiu gofie, ae ia finau pea ia maua le tau.

TUSI FAITAU: Mataio 7: 7 – 8

FESOASOANI MO FAIAOGA:

Tamaiti, o ai se isi o lo o fiafia lava ma toaga i lana aoga o aoga ai? Ae a le tatou Aoga Aso Sa? Lelei tele outou. A o ai la se tamaitiiti ua augata ma musu e alu i le aoga? Lelei, o le Mataupu la o lenei Aso Sa, e a’oa’oina ai tatou i le mea tonu e tatau ona tatou fai, e faapea - “**SAILI I LE ALII ONA MAUA LEA.**” O le tatou Tusi Faitau o le mataupu, o lo o faamatalaina ai i si upu o le lauga a Iesu, na a’oa’o atu ai i le motu o tagata. Ua ta’u mai e Iesu ia i tatou, o le a lava se mea lelei ua tatou fia maua, e ao ina tatou ole atu ma valaau ia te Ia, auā o ia lava na te foa’iina mai.

O lona uiga, afai ua tatou ole atu i le Alii, tatou te fia maua le poto, e alofa lava o Ia ma tali mai. Afai tatou te saili ia maua le poto, ia lē na o lo tatou tatalo ma nofonofo e leai se galuega e faia. E tatau ona tatou finau ma taumafai malosi. ‘Aua nei fiu gofie ae tu’itu’i atu pea ia Iesu, auā na te foa’iina mai lava, ma tatou maua mea lelei mai ia te Ia.

O le mea lea e taua ai le ola finau tamaiti, afai ua faaletonu i le isi taimi, ia saili pea ma lo tatou loto talitonu i le Alii, auā e silasila mai pea Iesu i le tagata e taumafai ma finau pea, ia maua le mea lelei o naunau i ai.

(E mafai foi e le faiaoga, ona faalatele le faamatalaga i isi mea lelei, e naunau atu ai le tagata i le Alii ina ia maua ft tupe, meaai (ma isi lava e tele)

Tamaiti ua a’oa’o mai lenei mataupu mo i tatou, ina ia tatou valaau ma faamoemoe i le Alii, e agalelei mai ma fesoasoani mai i mea ua tatou vaivai ma matitiva ai. Na o Iesu lava e maua ai le tali i o tatou manaoga lelei eseeese.

GALUEGA FAATINO: Filifili le upu sa’o.

Li’o le upu o i le lisi o upu i lalo, e lē talafeagai ma manaoga tatau, i mea ua tatou ole atu ai i le Alii ina ia tatou maua i le ola.

atamai, malosi, gaioi, faamaoni, faamaualuga, alofa, poto, loto fesoasoani, tauimasui, filemu, manatu faapito, onosa’i.

PESE: Jesus is the answer.

A’OA’OGA FOU:

1. Tatalo i le Alii ma galue.
2. ‘Aua le fiu gofie.
3. Faamalosi ‘aua le faavaivai.

TATALO:

Faafetai Iesu, auā ua e faamanatu mai ia i matou, le ala tonu matou te saili ai mo mea lelei i lo matou ola. Faamalosi mai i matou ina ia taumafai pea e manuia ai. Ona o Iesu Amene.

.....

ASO SA: 8 MATI 2015

MATAUPU: E AGALELEI LE ATUA IA I TATOU.

SINI: Ia a’oa’o le vasega ina ia malamalama, a tatou fia maua se fesoasoani valaau i le Atua e agalelei mai.

TUSI FAITAU: Neemia 4: 1 – 6.

FESOASOANI MO FAIAOGA:

Tamaiti, e i ai se isi o i ai ni mea e popole ai lona loto? Ia lelei, afai o i ai nisi o i ai ni mea o popole ma fefe ai i le va ma ona matua, ia taumafai e faalogo lelei i matua ma usita’i ia i laua i taimi uma. Afai foi o i ai se mea o e popole ai i lau aoga, ia taumafai e tatalo i la tatou uo o Iesu, o ia lava e agalelei mai ia i tatou.

O le tatou mataupu o lenei Aso Sa – ‘E AGALELEI LE ATUA IA I TATOU’ O lona uiga, so o se mea lava ua tatou mafatia ai, valaau i le Alii mo sana fesoasoani, auā o Ia lava e alofa mai. O le tatou Tusi Faitau sa faitauina, o lo o faamatala ai se galuega lelei sa faia e Neemia ma tagata o sa Iuta, e ala lea i lo latou toe atiinae a’e o pa o le aai o Ierusalem, na susunuina ma soloia, e Papelonia.

A o feagai ai la i latou i le galuega, na i ai tagata na faalavelave i le latou galuega fita. O tagata e igoa ia Sanepalata ma Tovia na taitai i tagata faatuiese, sa faatigā ia i latou a o fai le galuega. Sa latou faatauemu ia Neemia ma le nuu, pe faapefea ona latou toe atiina a’e faaputuga otaota ua susunuina. Ua latou uia foi i le pa, faapea e alu ane i ai se alope ma soloia i lalo maa.

Tamaiti, e lei avea lea ma mea na faavaivai ai Neemia ma ona tagata. Sa galulue pea ma tatalo atu Neemia i lo latou Atua, ina ia agalelei mai ia i tatou, ona o nei tagata ua latou inosia, ma faaluma ma faalili mai i latou ao faia le galuega.

E ui la i nei tala leaga mai tagata na faitioina le galuega, ae na tini lava le galuega, auā ua feso’otai le pa ma mae’a lelei. O le loto tetele o tagata na faia ai le galuega, o le loto na tuu i ai e le Atua, ia maea ai le pa, ma uma ai le faalavelave so’o o tagata leaga ia i latou.

Tamaiti, pe e te tigaina i feau i lou aiga, pe faigata foi lau aoga, ia outou galulue malosi ma valaau i lo tatou Alii e fesoasoani mai i le vaivai, auā o Ia lava e alofa ma tali mai.

UIGA O UPU

Sanepalata & Tovia - o tagata Samaria
faupuega - faaputuga
vaeluagalemu - ogatotonu; o le afa o le maualuga sa i ai muamua

GALUEGA FAATINO: (Faafesootai uiga o upu – Matching)

Faafeso'otai uiga sa'o o upu o i le vaega (A) i o latou uiga talafeagai o i le vaega (E)

A	E
1. faupuega	a) faalili
2. tauemu	e) aveesea
3. inosia	i) faamaasiasi
4. faaluma	o) faaputuga
5. soloiesea	u) itagia

Tali: 1. (o) 2. (a) 3. (u) 4. (i) 5. (e)

PESE: Ave ia Iesu mafatiaga.

Mafatiaga ave ia Iesu, aua o ia e alofa ia te a'u x 2
Luga, luga, luga, luga, luga, luga, luga
Sii Iesu i luga
Lalo, lalo, lalo, lalo, lalo, lalo, lalo
Tulei Satani i lalo.

Cast your burden unto Jesus, he cares for you x 2
Higher, higher, higher, higher, higher, higher
Higher higher, lift Jesus higher
Lower, lower, lower, lower, lower, lower
Lower, lower, push Satan lower.

A'OA'OGA FOU:

1. Galue ma faamoemoe i le Alii.
2. 'Aua le tauemu i tagata matutua.
3. Faamagalo i e faaluma mai..

TATALO:

Faafetai Iesu i a'oa'oga e tele, ua matou maua mai lau Afio. Ia e fesoasoani mai ina ia matou faamalolosi ia matou aoga, auā o oe lava e te agalelei mai i lo matou vaivai ma le valea. E ala atu ia Iesu le tatalo. Amene.

ASO SA: 15 MATI 2015

MATAUPU: UA LĒ MAPU I LE TALA'I ATU.

SINI: Ia a'oa'o le vasega ina ia malamalama, o se mea lelei tele le fiafia e ta'uta'u le suafa o Iesu.

TUSI FAITAU: Galuega 5: 27 – 42 (mo le Faiaoga)
Galuega 5: 40 – 42 (mole Vasega)

FESOASOANI MO FAIAOGA:

Tamaiti, o ai e fiafia e ta'uta'u le suafa o Iesu? Lelei tele. E ao ina tatou fiafia e ta'uta'u le suafa o Iesu, auā o Ia o la tatou uō. O Iesu na maliu ma toetu mo a tatou agasala, ma Ia faaolaina i tatou.

O le tatou mataupu la o lenei Aso Sa 'UA LE MAPU I LE TALAI ATU.' O lona uiga ua lē malōlō pe ua lē uma le fia ta'uta'u ma tala'i atu o le suafa o Iesu.

O le tala i le mea na tupu, pei ona faamatalaina i le tatou Tusi Faitau, ua faamatalaina ai le galuega tala'i sa faia e le au-so'o o Iesu, po o aposetolo. Sa latou faamaloloina i tagata mama'i i le suafa o Iesu, ma tala'i atu le Tala Lelei o le Faaolataga mo tagata uma. Sa toatele tagata Iutaia ma tagata mai isi nuu ese na talia ma le fiafia la latou tala'iga, ae sa i ai foi nisi na tete'e atu ia i latou. Sa lē faigofie la latou galuega ona o ē na malamalama e faaoo le leaga ia i latou, ona o le latou tete'e i le suafa o Iesu. Na oo lava ina sasaina i latou ma tuuina foi i falepuipui, ae nā lē faavaivai ai lava i le tala'i atu o le Tala Lelei ia Iesu toetu. Sa latou loto tetele lava ma olioli, ina ua ta'uaogāina i latou e le Alii, e ui ina sauaina i latou ona o lona suafa.

E ui foi i sauaga ua oo ia i latou, ae sa lē mapu ma malolo i le a'oa'o atu ma tala'i atu, e le gata i le malumalu, ae o lea fale ma lea aiga. Ma faapena ai lava ona tuputupu ae le to'atele o tagata ua talia ma faatuatua i le Tala Lelei ia Iesu Keriso manumalo.

E a'oa'o mai ai foi ia i tatou le fanau, so o se mea tatou te o i ai, ia tatou mafaufau pea i lo tatou Alii o Iesu, ma tatou fiafia e tala'i atu i isi tamaiti lona suafa ma lona alofa ia i tatou.

UIGA O UPU MA FUAITAU:

Aposetolo - o ave feau
- o i latou ua filifilia ma tofia e tala'i atu le Tala Lelei
- o so'o o Iesu o uluai aposetolo ia i le Tala Lelei
ta'uaogaina - ta'uuleleia/viia
faaleagaina - sauaina;faatigaina
Tala Lelei - o le tala sili i le maliu ma le Toetu o Iesu. O le tala i le Faaolataga o i tatou tagata agasala.

GALUEGA FAATINO: Faatulaga sa'o upu i fuaiupu.

Toe faatulaga sa'o mai e oe upu ia avea o se fuaiupu sa'o

- (a) latou, Sa, le, sasaina, au, aposetolo.
- (e) atu, tuuina, e i, na, le au, e o, latou, aposetolo.
- (i) o Iesu, o le, suafa, sa, i latou, faaleagaina, ona,
- (o) i tagata, aposetolo, sa, atu, a'oa'o, le au
- (u) fiafia, atu, e, talai, Tala Lelei, sa, le

(Tuu atu i lau susuga e faia le faasa'oga mo le galuega a tamaiti)

PESE: Jesus is the Rock
And He rolled my sins away x 3
Jesus is the rock x 3
And He rolled my sins away.

O Iesu le papa.
Na te aveese a'u agasala x 3
O Iesu le papa x 3
Na te aveese a'u agasala.

(Silasila i tusi mo faioga o isi tausaga 2013, 2012 o lo o maua ai upu o le pese)

A'OA'OGA FOU:

1. Fiafia e ta'uta'u le suafa o Iesu.
2. Ta'u atu i isi tamaiti le suafa o Iesu.
3. O Iesu e faaola mai i tatou.

TATALO:

Faafetai Iesu i la matou mataupu, o lenei Aso Sa. Faamalosi mai i matou, ina ia matou fiafia e ta'uta'u lou suafa i taimi uma, ma ia matou ola i le alofa pei ona e manao ai. E ala atu ia Iesu le tatalo. Amene.

ASO SA: 22 MATI 2015

MATAUPU: UA TAUANAU E ESAU SE MANUIA MO IA

SINI: Ia a'oa'o le vasega ina ia malamalama, sa manao Esau i se manuia mai lona tamā.

TUSI FAITAU: Kenese 27: 30 – 40 (mo le Faiaoga)
Kenese 27: 30 – 35 (mo le Vasega)

FESOASOANI MO FAIAOGA:

Tamaiti, o ai e fiafia e fai feau a ona matua? Lelei tele, o a ni feau e te fiafia e fai mo ou matua? Sa'o lelei, e tatau ona tatou augofie e fai meaai e aai ai tamā ma tinā, ia ma le tele lava o isi feau i le aiga.

Aisea la e tatau ai ona tatou fiafia e fesoasoani i o tatou matua? Ioe, auā foi e faamanuia mai i la'ua ia i tatou, ma faamanuiaina ai o tatou olaga e le Atua.

O le tasi aso, ina ua lagona e le toeaina o Isaako le fia 'ai, na ia fai atu ai i lona atalii matua o Esau e alu atu i le vao, e tuli mai se manu, ma ia saunia ai se kuka manogi mo ia. Sa usiusita'i Esau e tusa ma le faatonuga mai lona tamā.

Tou te iloa la tamaiti le mea na tupu? E taunuu atu Esau ma lana meaai manogi mo lona tamā, ua uma ona taumafa le toeaina, i le meaai na avatu i ai e Iakopo lona uso laitiiti. Ua uma foi ona faamanuia atu Isaako ia Iakopo.

Sa lagona le faanoanoa tele o Esau, auā ua uma ona taumafa lona tamā i le meaai na avatu e Iakopo, ma ia faamanuia foi ia te ia. Na tagiauē Esau i luma o lona tamā, ma ia tauanau atu ina ia faamanuia mai foi Isaako ia te ia. O le mana'omia e Esau o se faamanuiaga mai lona tamā, na folafola atu ai loa e Isaako ia Esau, o le a nofo o ia i le fanua lafulemu e faasusuina e le sau mai le lagi.

Tamaiti, o se a'oa'oga tele foi lea mo i tatou uma. E le gata ia tatou faamaoni i le tausiga o o tatou matua, ae ia tatou ola ma le loto talitonu i le Atua, o ia lava e tau ma tali mai i galuega lelei tatou te fai.

UIGA O UPU:

1. tetemu - popole vale/fefe
2. tagiaue - tagi tautala
3. faa'ole'ole - tau faasese/faafoliga

GALUEGA FAATINO: (Faatulagaga sa'o o mea tutupu)

O fuaiupu e ono o i lalo o lo o ta'u mai ai mea na tutupu i le tatou tala. Toe faatulaga mai e oe fuaiupu, faatatau i le mea na tupu muamua, se ia oo i le vaega na tupu mulimuli. Tusi le numera i le avanoa.

- _____ a. Ua tagiauē Esau
- _____ e. Ua avatu e Esau le meaai manogi mo lona tamā
- _____ i. Ua avatu e Iakopo le meaai mo Isaako.
- _____ o. Ua fai atu Esau i lona tamā, ina ia faamanuia mai foi ia te ia.
- _____ u. Ua tetemu le toeaina o Isaako.
- _____ f. Ua faamanuia Isaako ia Iakopo.

Tali: a. 5 i. 1 u. 4
 e. 3 o. 6 f. 2

PESE: Create in me a clean heart O God
 And renew a right spirit within me (x2)
 Cast me not away from your presence O Lord
 And take not your Holy Spirit from me
 Restore unto me the joy of your salvation
 And uphold me with a willing heart.

Le Atua e, ia e faia se loto mama mo a'u
Ma faafou se loto mau i totonu (x 2)
'Aua e te lafoa'iina, o a'u i ou luma
'Aua foi e te aveeseina lou Agaga Paia
Ia e faafoisia mai le olioli o le olataga
Ma taofi mau i le loto fiafia.

(silasila i tusi aoga o le 2011 – 2013 o lo o i ai le pese lea)

A'OA'OGA:

1. E manuia lou olaga pe a usita'i i matua.
2. Ia tatou maua le onosai.
3. O Iesu e fesoasoani mai.

TATALO:

Le Atua e, lo matou Tama, faafetai i le matou matupu o lenei Aso Sa. Faamagalo mai matou i lo matou le usiusita'i i matua. Alofa ma e faamalosi mai i matou ia auauna i matua ma matou ola matata'u i lau afio e manuia ai. Amene.

**ASO SA: 29 MATI 2015
(ASO SA LAUPAMA)**

MATAUPU: OSANA I LE ALO O TAVITA

SINI: Ia a'oa'o le vasega ina ia malamalama, sa alalaga fiafia tagata a'o afio atu Iesu i Ierusalem.

TUSI FAITAU: Mataio 21: 1 – 11 (mo le Faiaoga)
Mataio 21: 7 – 11 (mo le Vasega)

FESOASOANI MO FAIAOGA:

Tamaiti, o le a le mea lea tatou te faamanatuina i le Aso Sa lenei? Lelei tele. O le Aso Sa lenei ua tatou faamanatuina ai le malaga faatupu a Iesu i le aai paia o Ierusalem. Ua tatou ta'ua foi lenei Aso Sa, o le Aso Sa o laupama (Palm Sunday)

A'o latalata atu Iesu ma ona so'o i le aai o Ierusalem, sa latou malolo te isi ai i le nuu e igoa o Petefake i le mauga o Olive. O le finagalo o Iesu, ia o atu ni ona so'o se toalua e aumai le asini e tietie ai o ia i Ierusalem.

Ua aumai le asini iā Iesu, ona latou faaee ai lea o o latou ofu ma latou faatietie ai o Iesu i luga o le tama'i asini. A'o agai atu Iesu i lana malaga i le aai paia, o le toatele o le motu o tagata ua latou fofola o latou ofu i le ala, ao isi foi ua latou sala i lala o laau ma fola i le ala o afio mai ai Iesu.

O isi ua muamua atu a o isi ua mulimuli atu i le Alii ma latou tau fai alalaga – “Osana i le Alo o Tavita, ia manuia le afio mai i le suafa o le Alii. Osana i mea e aupito i luga.” O Iesu e tupuga mai ia Tavita le tupu o Isaraelu.

Sa vevesi le aai ina ua taunuu atu le malaga a Iesu i Ierusalem. Ua latou tu'u fesili foi po o ai lenei ua tietie mai i le asini. Peita'i na faailoa atu e le motu o tagata – “O Iesu lenei le perofeta mai Nasareta i Kalilaia.”

Tamaiti, e tatau ona tatou fiafia pea e faamanatu lenei Aso Sa i la tatou aoga Aso Sa, auā o le malaga lea a Iesu na maliu ai lava o Ia ma toetu manumalo ai, ua mafai ona ia faaola ai ia i tatou, mai a tatou agasala.

UIGA O UPU MA FUAITAU:

1. osana - ia e faaola mai

GALUEGA FAATINO: Faatinoga o le tala

O le galuega faatino talafeagai lava mo tamaiti, o le faatinoina lea o le malaga faatupu a Iesu e faiaoga ma tamaiti. Ua silafia lava e susuga i faiaoga le faatulagaga o le vaaiga o le malaga.

PESE: O pese masani lava ua pepese ai tamaiti i lea Aso Sa o le Laupama, e pei o:-

1. Osana pepese tamaiti uma.
2. Sei tatou pepese.

A'OA'OGA FOU:

1. Ia tatou fiafia e pepese i le Alii.
2. O Iesu lo tatou Faaola.
3. Ia ola fiafia.

TATALO:

Faafetai Iesu i le fiafia ua e aumai, matou te faatino ai lenei Aso Sa taua. Fesoasoani mai ina ia matou manatua pea lenei Aso Sa taua, ma ia matou fiafia e ta'uta'u ma pepese i lou suafa. Amene.

.....

MANATU TAIALA O APERILA: E LILIUINA E LE ATUA I TATOU

Afai tatou te ola i se olaga leaga ma le agasala, po ua tatou ola foi i se olaga lē talitonu i le Alii, o lo tatou Atua lava na te liliuina i tatou i se olaga lelei tatou te iloa ai o Ia, ma mafuta ai ma Ia i le fiafia i taimi uma.

ASO SA: 5 APERILA 2015

MATAUPU: O LE TALA FIAFIA E OFO AI. (ASO SA O LE TOETU)

SINI: Ia a'oa'o le vasega ina ia malamalama, o le tala fiafia i le toetu manumalo o Iesu, e liliuina ai le faanoanoa i le fiafia.

TUSI FAITAU: Mareko 16: 1 – 8

FESOASOANI MO FAIAOGA:

Tamaiti, o le a foi le mea lea na tupu i le Aso Faraile, lea sa tatou faamanatuina i le tatou lotu i le falesa? Ioe, sa tatou malolo mai a tatou a'oa'oga i lea aso, ona o le aso lea ua tatou faailogaina ai le maliu o la tatou uo o Iesu. Ua tatou ta'ua foi lea Aso Faraile, o le Aso Faraile Lelei (Good Friday). Sa pu'eina Iesu o tagata na inoino ma ita ia te Ia. Sa latou faasatauro ia Iesu seia oo lava ina maliu o Ia ma tanumia lona tino i le tuugamau.

Tamaiti, o le a la le mea lea ua tatou faamanatuina i le Aso Sa lenei? Lelei tele. O le Aso Sa lenei ua tatou faailogaina ai le Toetu manumalo mai o Iesu i le tuugamau na tuu ai. E ese le ofoofogia o lenei tala tamaiti, auā tatou te le'i vaai lava i se tagata, na tanu i se tuugamau, ae toe tu mai.

O le taeao lava na toetu mai ai Iesu, sa o atu ai Maria le Makatala, o Maria le tinā o Iakopo ma Salome, e avatu mea manogi e faauu ai i le tino o Iesu. A'o latou savavali i le ala, sa latou talatalanoa lava, i se tagata na te fuli'ese le maa o i le gutu o le tuugamau mo i latou.

Peitai, na latou iloa atu, ua uma ona fulieseina le maa, ona latou ulu atu lea i totonu ma iloa na o le laulealea o ofu i le ofu pa'epa'e tatapuvae i le itu taumatau. Na fai mai foi le taulealea ia i latou, ina ia 'aua le matata'u, auā o Iesu na faasatauroina, ua tu o Ia.

Tamaiti na matamata i latou ma molimau ai, e moni lava ua leai se tino o Iesu. Ua latou o vave i fafo mai le tuugamau, auā ua latou lagona le ofo tele. Ua tutumu i latou i le fiafia, auā e moni lava ua toetu le Alii.

Tamaiti, o le autu tonu lena o le mea ua tatou faamanatuina i lenei Aso Sa. O le faamanatuina o le tala fiafia i le mea ofoofogia ua tupu, auā ua manumalo Iesu mai ona fili, auā o lea ua toetu

mai i le tuugamau. O se tala lelei foi lea mo i tatou uma ia tatou olioli ma ofo ai, auā o le maliu ma le toetu o la tatou uo o Iesu ua faamagaloina ai a tatou agasala.

UIGA O UPU MA FUAITAU:

1. Makatala - o le nuu o Maria
2. fetautalatala'i - talatalanoa/fetufaa'i
3. ofu pa'epa'e tatapuvae - ofu tele mai le ua e oo i tapuvae

GALUEGA FAATINO: Faatinoga

A. Ia faatinoina e faiaoga ma tamaiti le tala o le toetu.

- le o atu o fafine e asi le tuugamau
- ulu atu i le tuugamau
- Ua o ese mai le tuugamau

(Tusa lava pe le maua uma upu sa'o o tautalaga i le tusi faitau, ae ia maua e tamaiti le agaga moni o le Aso Sa o le Toetu.)

- PESE:**
1. Pe na e i ai ao faasatauroina o ia
Where you there when they crucified my Lord.
 2. Where you there when He rose from out the tomb
Pe na e i ai ao toetu mai o ia.

(Silasila i le Tusi Aoga o le 2013 [21] o lo o i ai le pese atoa o i luga, ina ia saga a'oa'o atili pea i tamaiti)

A'OA'OGA FOU:

1. O Iesu le Alii toetu.
2. Ia tatou ofo ma talitonu moni.
3. Ia fiafia ia Iesu.

TATALO:

Faafetai Iesu lo matou Alii, auā na e onosa'i i ou puapuaga, na e maliu i le satauro ma tuuina oe i le tuugamau, ae ua e toetu manumalo mai. Ia e alofa ma faamagalo lo matou ola agasala, ma ave a i matou o ni tagata faaolaina. Ona o lou suafa Iesu. Amene.

ASO SA: 12 APERILA 2015

MATAUPU: UA VAOIA REOPOAMO E LE ATUA.

SINI: Ia a’oa’o le vasega ina ia malamalama, sa usiusita’i Reopoamo i le afioga a le Alii.

TUSI FAITAU: 2 Nofoaiga Tupu 10: 16 – 11: 4 (mo le Faiaoga)
2 Nofoaiga Tupu 11: 1 – 4 (mo le Vasega)

FESOASOANI MO FAIAOGA:

Tamaiti, e iloa e outou, o a ni mea e masani ona a’oa’o ma talanoa mai ai o tatou matua, ia i tatou i o tatou aiga? Lelei tele. Ioe, e tele lava mea lelei e a’oa’o mai ai o tatou matua mo i tatou le fanau, aemaise lava i le va o oe i lou uso, lou tuagane, tuafafine ma ou matua foi. E tatau ona alofa le tasi i le isi ma ola fealofani.

O le tatou mataupu o lenei Aso Sa, “**UA VAOIA REOPOAMO E LE ATUA**”

O Reopoamo, o ia o le atalii o Solomona le tupu o Isaraelu. Ina ua maliu lona tamā, ona fai ai lea o ia ma tupu o Isaraelu uma. E i ai nisi manaoga o tagata na latou avatu i le tupu, sa le’i faalogo ma usita’i i ai Reopoamo. Sa iloa e Reopoamo ua lē fiafia tagata ia te ia, ona sola ai lea o ia i lana kariota i Ierusalemā, auā ua lamalama tagata ia te ia.

A o i ai la o ia i Ierusalemā, sa ia taumafai ai loa e faapotopoto lana autau mai tagata o Iuta ma Peniamina e tau le taua ma tagata o Isaraelu ua ita mai ia te ia, ina ia toe maua le malo atoa mo ia.

Sa silafia e le Alii lenei fuafuaga a Reopoamo, ona ia auina atu ai lea o Semaia le perofeta, ina ia ta’u atu ia Reopoamo, e ‘aua nei o a’e e si’i atu le taua, auā o i latou lava o o latou uso. O le faatonuga lea na faalogo i ai le tupu ma tagata uma, auā ua vavao mai le Atua ia i latou. Ua liliuina le loto o le tupu ma ua lē o atu ai e tau le taua.

E taua lenei tala tamaiti mo i tatou. E le se mea e finagalo ai le Atua, pe afai tatou te taumafai e fai se mea leaga i sou uso, tuafafine, tuagane po o se isi foi tagata. E tatau ona tatou loto faamagalō ma ola fealofani, ona tatou iloa lea ua tatou ola i le finagalo o le Alii. Manatua foi tamaiti na a’oa’o mai la tatou uo o Iesu – “Amuia e faatupuina le filemu; aua e ta’ua i latou o atalii o le Atua (Mataio 5: 9)

UIGA O UPU MA FUAITAU:

- | | | |
|----------------------|---|---------------------------------------|
| 1. faataalise | - | faanatinati, faatopetope |
| 2. kariota | - | o le taavale e toso e solofanua |
| 3. Iuta ma Peniamina | - | o isi ituaiga o le fanauga a Isaraelu |

GALUEGA FAATINO: (Faafetaui uiga o upu) Matching

Faafetaui upu o i le itu agavale i o latou uiga i le itu taumatau.

- | | | |
|-------------|----|---------------------|
| 1. Solomona | a. | perofeta a le Atua. |
| 2. Reopoamo | e. | tamā o Reopoamo |
| 3. Aturamo | i. | taavale solofanua |
| 4. Semaia | o. | tupu o Iuta |
| 5. kariota | u. | pule i taulaga |

Tali: 1. e 2. o 3. u 4. a 5. i

PESE: E alofa Iesu ia i tatou uma

A'OA'OGA FOU:

1. Usita'i i le Alii.
2. Faamagalo i ou fili.
3. Liliu ese i mea leaga ma faaososoga.

TATALO:

Faafetai Iesu i lou a'oa'o mai ia i matou. Ia e faamalosi mai i matou, ina ia matou ola fealofani ma faia pea lou finagalo i taimi uma o lo matou ola. E ala atu iā Iesu le tatalo. Amene.

ASO SA: 19 APERILA 2015

MATAUPU: UA NAUNAU LITIA I LE ALII.

SINI: Ia a'oa'o le vasega ina ia malamalama, o lo tatou fiafia e faalogologo i tala ia Iesu, e tupu ai foi le naunau i le Alii.

TUSI FAITAU: Galuega 16: 11 – 15

FESOASOANI MO FAIAOGA:

Tamaiti, o ai se isi o le tatou vasega e le fiafia e faalogologo i tala ia Iesu? Lelei tele, o i tatou uma e tatau ona naunau ia iloa tala i la tatou uo o Iesu. O Iesu, o ia lo tatou Faaola. O Ia sa a'oa'o mai i a'oa'oga lelei ma le aogā, e manuia ai o tatou olaga. Sa maliu o Ia ma toetu mai le tuugamau, ia faaolaina ai tatou uma. E tatau foi ona tatou fiafia e ta'uta'u le igoa o Iesu ma ta'u atu i isi au uō. O le tatou mataupu la o lenei Aso Sa, ua faamatalaina ai le tasi fafine ua liliuina lona loto, e taliaina ai le tala ia Iesu.

A o faasolo atu le tala'iga a Paulo i Maketonia, sa latou taunuu ai loa i le aai e igoa o Filipi ma nonofo ai loa i nai aso. Ua oo i le Aso Sa, ona latou o atu ai lea i le auvai o le vaitafe. O lea nofoaga e masani ona potopoto ai tagata i talosaga ma a'oa'oga o le Tusi Paia. O iina na faia ai e Paulo le a'oa'oga o le Tusi Paia i fafine na potopoto ai. Sa i ai i lea potopotoga le fafine e igoa ia Litia, o ia e sau mai le nuu o Tuatira. O ia o le faatau ie pauli. Na faalogo Litia i le a'oa'o mai o Paulo, ona tatalaina ai lea e le Alii o lona loto, ma ua naunau ai e talia upu ua a'oa'o mai ai o ia. O lona uiga ua liliuina lona loto le talitonu, e talitonu ai i le tala lelei.

O le tupu ae o lona naunau moni i le tala'iga, na tu'uina atu ai lona aiga uma ia papatisoina e Paulo. Na ia ofo atu foi lona fale ia Paulo ma le au malaga, latou te nonofo ai, auā ua tupu lona fiafia ma naunau lona loto i le tala iā Iesu toetu.

Tamaiti, o lo tatou naunau ia iloa Iesu, e tupu ai foi lo tatou fiafia. Tatou te maua ai foi a'oa'oga aogā mo le tatou ola. E tatau ona tatou toaaga e faitau le Tusi Paia, ma faalogo i mataupu o le Aoga Aso Sa, aemaise foi o lauga a le faifeau i le Aso Sa.

UIGA O UPU MA FUAITAU:

1. Teroa, Neapoli, Filipi - o aai i totonu o Maketonia.
2. Maketonia - o le itumalo o Eleni
3. ie pauli - o le ituaiga ie taugata, na o tagata maumea e mafai ona faatauina.

GALUEGA FAATINO: Faatumu Avanoa

Faatumu avanoa o i le parakalafa i lalo, i upu ua tuuina atu:- nonofo, upu, ie pauli, papatisoina, naunau, Tuatira, tatalaina.

O Litia o ia o se fafine mai le nuu o _____(1)_____. O ia o le faatau _____(2)_____. Sa _____(3)_____ e le Alii lona loto, ma ia _____(4)_____ atu ai loa e faalogo i _____(5)_____ na a'oa'o mai ai Paulo. Sa _____(6)_____ o ia ma lona aiga uma e Paulo, ma ia aioi atu ia te ia, ina ia latou _____(7)_____ mai latou i lona fale.

- Tali: 1) Tuatira 2) ie pauli 3) tatalaina 4) naunau
5) upu 6) papatisoina 7) nonofo

PESE: A'oa'o le pese fou lea.

Lautele, lautele pei o vasa
Mauluga pei o le lagi i lugā
Loloto, loloto pei o le sami loloto
E faapena le alofa o le Tamā
E ui ina ou faatauvaā
E tausia pea a'u e le Tamā
Fai mai le Tusi Sa
O lona alofa e sili lea.

Wide, wide as the ocean
High as the heaven above
Deep deep as the deepest sea
Is my Saviours love
I though so un worthy
Still I'm a child of His care
For His word teaches me
That His Love reaches me
Everywhere.

A'OA'OGA FOU:

1. Fiafia e faitau le Tusi Paia.
2. Naunau ia iloa tala ia Iesu.
3. E sili le alofa o Iesu.

TATALO:

Faafetai Iesu i le mataupu o lenei Aso Sa. Ia e faamanuia i o matou faiaoga Aso Sa, ina ua latou fiafia e a'oa'o matou i tala iā Iesu le Faaola. Fesoasoani mai ia matou fiafia pea e faalogo i tala o le alofa o Iesu. Ua matou tatalo atu, e ala iā Iesu lo matou Alii ma le Faaola. Amene.

ASO SA: 26 APERILA 2015

MATAUPU: UA FAAMAGALO E IESU LE FAFINE AGASALA.

SINI: Ia malamalama le vasega, e taua i le Alii le ola faamagalō atu, ae lē o le taua ma sui.

TUSI FAITAU: Ioane 8: 1 – 11 (mo le Faiaoga)
Ioane 8: 9 – 11 (mo le Vasega)

FESOASOANI MO FAIAOGA:

Tamaiti, o le a le uiga o le upu agasala? Ioe, o le agasala, o lo tatou faia lea o ni amioga lē tatau i lo tatou olaga. O ā ni amioga lē tatau ua tatou fai e iloa ai ua tatou agasala? Lelei tele, afai tatou te pepelo, faamaualuga, gaoi, tauimasui ma isi lava amioga faapena, o lona uiga ua tatou faia lava le agasala i luma o le Atua. O lona uiga e lē fiafia Iesu pe afai tatou te agasala, ae naunau le Alii ina ia faamagalō mai, ma ia tatou salamō i mea leaga e tele ua tatou fai.

O le tatou mataupu la o lenei Aso Sa ua faamatalaina ai le fafine agasala, ae na faamagaloina e Iesu. A’o a’oa’o atu Iesu i le malumalu, sa toatele tagata na o mai ia te ia e fia faalogologo i lona a’oa’o mai. O lea foi taimi, sa ta’ita’iina mai ai e le au tusiupu ma le au faresaio le fafine agasala i totonu o le malumalu. Sa latou ta’u atu foi ia Iesu, o lenei fafine ua latou mautinoa lava lana agasala. Sa latou ta’u atu foi ia Iesu, o le tulafono a Mose, ia fetogi i ma’a o e agasala faapea. Tou te iloa tamaiti, e lei tali i ai Iesu ia i latou, ae ua ia punou ma tusi lona lima i le eleele. Sa latou fesili atu pea i le Alii, ona nofo lea o ia i luga ma faapea atu – “O so outou e leai sana agasala, ia lua’i togi se ma’a ia te ia.”

A’o toe punou ifo Iesu ma toe tusi i le eleele, o le taimi lava lena na taitasi ai i latou ma alu i fafo, ae tuua ai na o Iesu ma le fafine. Ua latou iloa e leai lava se tagata e lē agasala, ma e lē mafai foi ona latou faasala i le fafine, aua e agasala uma i latou.

O lea lava taimi na fetalai atu ai loa Iesu i le fafine – “Ou te lē faasala foi ia te oe, alu ia oe ‘aua e te toe agasala.” Ua faamagalō atu Iesu ia te ia i lana agasala na fai. E finagalo Iesu ia salamō ma liliu ese mai le leaga, ae ia ola fiafia i le amiotonu a le Alii.

Tamaiti, e taua le a’oa’o mai o lenei tala ia i tatou, auā e leai lava se tagata e lē agasala. Peita’i e alofa lava Iesu ma faamagalō mai lo tatou leaga. E finagalo foi Iesu ia tatou ola mamā ma usita’i ia te ia. Afai foi ua tatou agasala, ia tatou faamaualalo i le Alii ia faamagalō mai i tatou.

GALUEGA FAATINO – Tali Fesili

Tali mai fesili nei faatatau i le tatou tala.

1. O fea na a’oa’o atu ai Iesu i tagata?

Tali: O totonu o le malumalu.

2. O ai na ta’ita’iina mai le fafine mulilua?

Tali: Tusiupu ma Faresaio.

3. O le a le poloaiga a Mose i e agasala faapea?

Tali: Fetogi i ma’a.

4. O le a le gaoiga a Iesu na fai a’o punou ifo o ia i le eleele?

Tali: Tusi i lona tamatama’i lima i le eleele.

5. Na faasala e Iesu le fafine?

Tali: E leai, sa ia faamagalo ia te ia, ae ia ‘aua nei toe agasala.

PESE: Create in me a clean heart O God

Create in me a clean heart O God
And renew a right spirit within me (x2)
Cast me not away from your presence O Lord
And take not your Holy Spirit from me
Restore unto me the joy of your salvation
And uphold me with a willing heart

Le Atua e, ia e faia se loto mamā mo a’u
Ma faafou se loto mau i totonu (x 2)
‘Aua e te lafoa’iina, o a’u i ou luma
‘Aua foi e te aveeseina lou Agaga Paia
Ia e faafoisia mai, le olioli o le olataga
Ma taofi mau i le loto fialia.

A’OA’OGA:

1. E lelei ona a’oa’o faatasi e tamaiti le fetalaiga lea a Iesu na fai atu ai i le fafine agasala, e fai ma a’oa’oga i le mataupu. “Ou te lē faasala foi ia te oe, alu ia oe, ‘aua e te toe agasala.”

TATALO:

Faafetai Iesu i lou a’oa’o mai ia i matou, ina ia matou ola ai ma le mautinoa, e te lē fialia i le agasala i o matou olaga. Faamagalo mai i matou le fanau agasala, ma ia e faaola mai i matou. O la matou tatalo lea, e ala atu i le Suafa Paia o Iesu, Amene.

MANATU TAIALA O ME: ‘AUA LE POPOLE

E maua lava i tatou i le lagona o le popole i le tele o taimi o lo tatou ola. O se lagona ua iloa ai le vaivai, po o le matua leai lava o so tatou faamoemoe i lo tatou Atua. Ma e tataua ai lava ona tuu atu lo tatou popole i lo tatou Alii, e ala i le tatalo e le aunoa, o Ia lava e alofa ma tali mai.

ASO SA: 3 ME 2015

MATAUPU: ‘AUA NEI POPOLE OUTOU I SE MEA E TASI.

SINI: Ia malamalama le vasega, e le se lagona lelei le popole i mea o lenei lalolagi.

TUSI FAITAU: Filipi 4: 4 – 7

FESOASOANI MO FAIAOGA:

Tamaiti, o ai e masani ona maua i le lagona popole? Ia e sao lelei. Aisea e mafua ai ona tatou popole i nisi taimi? Ioe, e ala ona tatou popole, ona ne'i sasa i tatou e matua, ona ua tatou le usiusitai ia i la'ua. E faapena foi i lau aoga, e te popole nei fue oe pe faasala oe e le faiaoga, pe a le faia lau galuega na aumai e fai i le fale (homework)

Tamaiti, o nisi foi taimi, e maua tatou i le popole, pe a leai se tupe e faatau ai se meaai i le aoga. Afai foi e lūlūina se mafui'e, pe oo mai foi se afā malosi, tatou te lagona foi le popole, ne'i mea ane ua pa'u ai o tatou fale, ma aafia ai lo tatou ola i se galu malosi.

Tou te iloa tamaiti, o le popole o se lagona leaga, auā ua atuatuvaile ai o tatou loto, ma foliga ua leai se faamoemoe ia i tatou mo se fesoasoani. O le tusi faitau la o lenei Aso Sa, ua fa'aalia ai se a'oa'oga taua mo i tatou, pe afai e maua i tatou i le popole. Ua faamatalaina i le tatou tala o lenei Aso Sa, se vaega o le tusi a le aposetolo o Paulo i tagata o le ekalesia i le nuu o Filipi. Ua aioi atu ma le alofa Paulo, ina ia tumau tagata uma i le mafutaga ma le Alii, latou te maua ai le olioli. 'Aua foi ne'i popole i se mea e tasi e oo mai ia i latou. Afai e tupu a'e le popole i o latou loto, ia faailoa atu i le Atua e ala i le tatalo. O a mea lelei e manao i ai le tagata mo lona ola, ia faatoga atu i le Atua ma le loto faafetai.

O lona uiga, o a mafatiaga e oo mai i le tagata ma ua tupu ai lona popole, ole atu ia Iesu, auā o Ia e alofa lava ia te oe ma au.

Tamaiti, o a lava mea e faaosoosoina ai i tatou, ma faapopoleina ai tatou, ia tatalo e le aunoa i le Alii, auā e tali mai Iesu ma faamanuia mai ia i tatou. O fea lava tatou te saili i ai mo se fesoasoani i mea o popole ai, e silisili lava le Alii, auā na te leoleoina ma pulea o tatou loto ma mafaufau i mea lelei.

Tamaiti, e a'oa'oina foi tatou i lenei tala, ina ia 'aua nei faamamafaina i o tatou loto ni mea o tatou popole ai. E tataua ona tatou nonofo ifo i lalo, ma tatalo atu i le Alii. Mafaufau i le alofa o le Alii, e fesoasoani mai i o tatou mafatiaga.

GALUEGA FAATINO: Faauma fuaiupu i faaupuga sa'o.

Filifili faaupuga talafeagai ua tuuina atu, e faaiu ai fuaiupu o i lalo i le faitauga sao:- e ala i le tatalo/e mai le Atua/i se mea e tasi/e Iesu/i le Alii.

1. Ia outou olioli _____ . (i le Alii)
2. 'Aua nei poople outou _____ . (i se mea e tasi)
3. Faailoa ou mana'o i le Alii _____ . (e ala i le tatalo)
4. O le manuia _____ . (e mai le Atua)
5. Ia pulea o tatou loto ma mafaufau _____ . (e Iesu)

PESE:

Fai sau tatalo

Fai sau telefoni
 Vili ma le faamaoni
 O lo o faatali le Alii
 Mo oe i so o s taimi
 Fai sau filifiliga
 Po o le a ea lau tali
 Le numera aua nei galo
 O le TATALO – TATALO

Tali:- Telefoni maia aua e te faatamala
 O lo o avanoa o le laina
 Ua uma ona ia faia
 Ia e vili sa'o atu
 O lo o faatalitali mai
 Le laina o lo o avanoa
 Mo so o se tasi aua le tuai
 Le numera aua nei galo.
 O le TATALO

A'OA'OGA:

1. Ia fiafia i le Alii i so o se taimi.
2. Tatalo i le Alii pe a popole i se mea.
3. E manuia tatou pe a usitai i le Alii.

TATALO:

Faafetai Iesu i lou a'oa'o mai ia i matou, ina ia matou tatalo atu i le Alii, pe afai e oo mai le loto popole ia i matou. Faamagalō mai matou, ona ua matou lē toaaga e tatalo atu i lau Afio. Ua matou tatalo ai, ia e faamanuia mai ia i matou. Ua matou ole atu e alu i le suafa o Iesu Keriso. Amene.

ASO SA: 10 ME 2015
(ASO SA O TINĀ)

MATAUPU: O IESEPELA FAUTUA LEAGA.

SINI: Ia malamalama le vasega, e lē lelei le fuafuaga na faia e le fafine o Iesepela.

TUSI FAITAU: 1 Tupu 21: 1 – 16 (mo le Faiaoga)
1 Tupu 21: 13 – 16 (mo le Vasega)

FESOASOANI MO FAIAOGA:

Tamaiti, o le a foi le mea lea ua tatou faamanatuina i le Aso Sa lenei? Lelei tele, o le Aso Sa e lua o le masina lenei o Me i tausaga uma, ua tatou faamanatuina ai le taua o o tatou tina. O ai e alofa i lona tina? Lelei, e tatau lava ona tatou alolofa i o tatou tina, aua o ia lava ua tausia i tatou. O tina foi e faia mea lelei uma mo i tatou, ma fautua mai foi i amioga ma faatinoga e ao ina tatou fai, e manuia ai o tatou olaga. E lē fautua mai lava tina i ni mea e leaga ma malaia ai tatou. Tamaiti e tele lava mea lelei ua faia e o tatou tinā, mo i tatou le fanau, aemaise foi i o tatou aiga ma le lotu.

Tamaiti, ua le pei o o tatou tinā lelei, le fafine lea ua faatatau i ai le tatou mataupu, pei ona tatou faitau ai i le Tusi Paia. O le tatou tala la o lenei Aso Sa o tinā, ua faamatalaina ai le fafine o Iesepela ma lana fautuaga leaga na fai. O Iesepela, o le avā a Aapo le tupu o Samaria. Sa i ai le tagata e igoa ia Napota le Isereelu i le itumalo na pulea e le tupu o Aapo. Sa i ai le tovine o Napota e latalata i le maota o Aapo, ma na manao i ai Aapo. Na iu lava ina aisi i ai Aapo ia Napota, pe mafai ona fai mo ia lona tovine, ae fesui ai i sona tovine. A lē o lona foi, pe mafai ona faatauina mai e Aapo i se tupe e manao i ai Napota.

Tou te iloa tamaiti. E lei mafai Napota ona tuu atu lona tovine ia Aapo, auā e manumanu Napota ona o le tofi po o le meatotino a lona aiga. O le ala lea na ita ai Aapo. Fai mai ua lē ai ma ua lē moe foi le tupu, ona o le ita tele ia Napota. Na iloa e le fafine o Iesepela le mea ua tupu, ona ia tala’iina lea o le malo uma, ina ia potopoto i le maota o le tupu, e vaavaai i le faasalaga i le oti, o le a fai ia Napota. Na molimau pepelo atu Iesepela i le nuu uma, na faifai Napota i le Atua ma le tupu.

Tamaiti, na faataunuuna lava le mea leaga na fuafua e lenei fafine o Iesepela. Ua o mai i luma o le nuu tagata ulavavale e toalua, ma la molimau pepelo atu i tagata. O Napota ua faifai i le Atua ma le tupu. O lea lava taimi na latou avea ai loa Napota i tuapā o le aai, ma fetogi ia te ia i maa, ma maliu ai lava. Na iloa e Iesepela ua oti lava Napota, ona ia fai atu ai le ia Aapo, ina ia alu loa e fai mo ia le tovine o Napota.

Tamaiti, e ese le leaga o le mea na fai e lenei tinā o Iesepela. O lana fautuga pepelo na fai, ae ua oti ai lenei tagata. E a’oa’o ai foi tatou, ina ia ‘aua, ‘aua lava nei o tatou taumafai e fai se molimau po o se tala pepelo e faaleaga ai ma puapuagatia ai isi ou uso ma tuafafine, aua e silafia e le Atua mea tatou te fai.

(fautauga – E fautuaina le faiaoga e faamatala le tala faapei o se tala faa-fagogo)

GALUEGA FAATINO: (Filifili i le faamatalaga sa’o)

Filifili ma tusia i lau api, faamatalaga sa’o ma talafeagai e faatatau ia Iesepela

O Iesepela

- i). o le ava a Aapo
- ii) o se fafine fautua lelei
- iii) o le tuafafine o Napota
- iv) na tusia ni tusi i le igoa o Aapo
- v) e toalua lana fanau
- vii) o se masiofo faufau leaga
- viii) na ita i le oti o Napota
- ix) le fafine lē alofa
- x) e lalelei ma amiolelei.

PESE: When we walk with the Lord

When we walk with the Lord
In the light of His word
What a glory, He sheds on our way
While we do His good will
He abides with us still
And with all who will trust and obey

Ch: Trust and obey
For there's no other way
To be happy in Jesus
But to trust and obey

A'OA'OGA:

1. 'Aua le fia pule i mea a isi tagata.
2. E lē fiafia Iesu i le molimau pepelo
3. Alofa i tagata vaivai.

TATALO:

Faafetai Iesu i lenei tala manaia, ua a'oa'oina ai i matou i amioga e le tatau ona matou faia. Faafetai i lau tausiga i o matou tinā. Faamagalo matou le fanau, auā ua matou ola lē usiusita'i ma alolofa i o matou tinā. Tamā, sei e tausia o matou tinā, ia maua e i latou le soifua lelei ma le faamaoni i lo matou aiga. E ala atu i lou suafa Iesu le matou tatalo. Amene.

ASO SA: 31 ME 2015

MATAUPU: ‘AUA LE FEFE AE FAALOGO I LE ATUA.

SINI: Ia malamalama le vasega, o lo tatou Atua na te aveesea le fefe ia i tatou.

TUSI FAITAU: Kenese 21: 1 – 18 (mo le Faiaoga)
Kenese 21: 15 – 18 (mo le Vasega)

FESOASOANI MO FAIAOGA:

Tamaiti, o a ni taimi o lo tatou olaga e masani ona tupu ai le fefe ia i tatou? Sa’o lelei lava, e maua i tatou i le fefe, pe afai ua tatou faia se amioga le tatau, pei o le gaoi ma isi. Tatou te fefefe foi pe a tatou vaai i se faalavelave mata’utia, i se tagata ua manu’a i se misa, pe aafia foi i se taavale. O nisi foi taimi, e oo mai ai le fefe, pe afai ua tatou fememea’i, ma lē iloa le mea a fai, aemaise lava pe a ma’i tigaina se isi o lou aiga.

O le tatou tala o lenei Aso Sa, ua faatauaina ai mo i tatou le fanau, le siufofoga alofa ma le leo mafanafana o le Atua, na fetalai ifo ai i le fafine o Akara. O Akara, o le fafine Aikupito. Sa fai o ia ma auauna fafine a Sarai le ava a Aperaamo. Talu ai ona o le ita tele o Sarai ia Akara ma lana tama o Isamaeli, o lea na ia fai atu ai ia Aperaamo, e tuli ese Akara ma lana tama mai lo latou aiga.

E ui lava ina tigā ai Aperaamo i le tonu a Sarai, ae sa faataunuuna lava. O le malaga lea na lagona ai e Akara lona fefe ma lona lē mautonu, auā ua vaivai le tino o Isamaeli, ona ua uma le vai i le fagu pa’u. Ua na le iloa le mea a fai. O le pogai lea na ia tuu ai le tama i lalo o se tasi laau, ae ua alu ma nofo mamao mai i le isi itu ma tagi ai, e musu e vaai atu i le oti o lana tama.

Tamaiti, o lona lava taimi, na valaau mai ai loa le agelu a le Atua ia Akara mai le lagi – “Akara e, ua faapefea ea oe? ‘Aua e te fefe, auā ua faafogaina e le Atua le leo o le tama i le mea o i ai o ia.”

Sa lagona le mafanafana o le loto o Akara ina ua faalogo atu i le leo mai le Atua. Na toe malosi lona tino ma le loto, ma ia toe savali atu ai loa ma sii ae le tama i ona lima. Tamaiti, na toe maua le malosi o le tama o Isamaeli, auā na maua le vai e inu ai o ia, mai le vaieli na faasino e le Atua i lona tinā. E ui ina fefe Akara, ae sa i ai lava le Atua ia te ia aemaise lava le tama o Isamaeli.

Tamaiti, ua a’oa’o mai tatou, ina ia tatou mafaufau i lo tatou Alii i taimi uma, e feagai ai tatou ma puapuga. O Iesu o lo tatou faoala alofa, e tautoalua i tatou i faigata e oo mai.

GALUEGA FAATINO: ‘Sa’o’ po o le ‘Sese’

Tali mai i le “Sa’o” po o le “Sese”, faatatau i fuaiupu o i lalo mai le tatou tala.

- (i) O Sarai le igoa o le avā a Aperaamo.
- (ii) Sa fiafia Sarai ia Akara ma lana tama.
- (iii) Na oti lava le tama o Isamaeli i le vao.
- (iv) Na fefe Akara auā ua vaivai i le tama o Isaraeli o le a oti.
- (v) Na silafia e le Atua le mea ua fefe ai Akara.
- (vi) Sa fiafia Aperaamo ina ua o ese Akara ma lana tama.
- (vii) Sa toe maua le vai inu mo Akara ma le tama.
- (viii) O Akara o ia o le fafine pologa mai Aikupito.

PESE: Faaiu i le pese masani
“When we walk with the Lord

A'OA'OGA:

1. Mafaufau i le Alii i taimi uma.
2. Savavali ma Iesu e le fefe ai.
3. Alofa i tagata ese

TATALO:

Faafetai Iesu i lenei mataupu, auā ua e faailoa mai, ina ia matou mafaufau i lau afio, pe a maua i matou i faigatā. Ia e aveese le fefe i o matou loto, ae ia tatou mafuta pea ma lau afio i taimi uma. Ua matou tatalo atu i lau afio, e ala i le suafa paia o Iesu Keriso. Amene.

MANATU TAIALA O IUNI: FESOASOANI I E UA MAFATIA

O se meaalofa silisili lea e manao Iesu tatou te faia, o le fesoasoani lea i e ua mafatia.

ASO SA: 7 IUNI 2015

MATAUPU: UA FESOASOANI IESU I LE LEPELA.

SINI: Ia a'oa'o le vasega ina ia malamalama i le galuega na faia e Iesu na malōlō ai le lepela.

TUSI FAITAU: Luka 5: 12 – 16 (mo le Faiaoga)
Luka 5: 12 – 13 (mo le Vasega)

FESOASOANI MO FAIAOGA:

Tamaiti tou te iloa, o le a lea mea o le lepela? (*Lepela o le faama'i o le pa'u*) O ai ua vaai i se lepela? Ailoga ua vaai se isi o tatou i se tagata e maua i lea ma'i, sei vagana ai ata tifaga. O lenei ma'i, e papala atoa le tino mai le ulu i tamatamaivae, e manogi leaga, e pepesi foi. I nei i Samoa, e i ai le Falemai faapitoa o ma'i lepela i Motootua e tu i tua i le togavao e mamao ese mai le Falemai tele, e puipua ai tagata mai le pepesi o lea faama'i faapea le leaga o le manogi se'i tulou.

Fai mai le tatou Tusi Faitau, ao savali ane Iesu i le ala o lea aai, na iloa atu ai o Ia e le tagata lepela. Ua oo atu o ia iā Iesu, ona faapa'u fao ai lea o ia ma aoi atu ia te Ia, "Le Alii e, a e finagalo i ai, e mafai lava ia te oe ona faamamā ia te au." Ae na tali Iesu, "Ou te loto i ai. Ia mamā oe." Na pa'i Iesu i le lepela ona te'a ese ai lea o lona ma'i. Na fai atu Iesu i le lepela, "Aua le ta'u atu i se tasi, a ia alu, ma fa'aali oe i le Ositaulaga, ma avatu mo lou faamamāina e tusa ma le poloaiga a Mose, e fai ma faamaoniga ia i latou."

Tamaiti, e lei fefe Iesu e faalatalata i le lepela, pe na fa'aalia foi sona inoino i le manogi o le ma'i. Sa alofa tele o Ia i lenei tama ona o lona faatuatua, na le mā ai e sau ia te Ia ina ia faamamāina lona ma'i. Tamaiti, E manao Iesu, ina ia tatou alolofa ma fesoasoani i tagata po o isi tamaiti ua latou manaomia la tatou fesoasoani. E le gata i lea, ao latou foi ua mafatia i ma'i ae faapea latou ua puapuagatia i mafatiaga e tele.

UIGA O UPU:

1. liloia - lilo atoa
2. lepela - o le faama'i o le pa'u po o le tino

GALUEGA FAATINO: FAATUMU AVANOA

Faitau Luka 5: 12 – 13 ma faatumu avanoa

[12] Sa i le tasi _____ o Ia, faauta o le _____ ua _____ i le _____; ua iloa atu e ia o _____, ona _____ fao ai lea o ia, ma _____ mai ia te Ia, ua faapea mai, "_____, a e _____ i ai, e mafai lava ia te oe ona _____ ia te au."

[13] Ona _____ atu lea e Ia lona _____, ua _____ atu ia te ia, ua faapea atu, "Ou te _____ i ai; ia _____ oe." Ona _____ ese loa lava lea o le _____ ia te ia.

PESE:

Le alofa o Iesu e ofoofogia
Le alofa o Iesu e ofoofogia
Le alofa o Iesu e ofoofogia
Le alofa silisili lea mo au.

*The love of Christ its so wonderful
The love of Christ its so wonderful
The love of Christ its so wonderful
Oh what a wonderful love*

E maualuga ou te le a'eina
E maualalo ou te le mauuina
E lautele ou te le opoina
Le alofa silisili lea mo au.

*So high I can't get over it
So low I can't get under it
So wide I can't get 'round it
Oh what a wonderful love.*

A'OA'OGA:

1. Ia tatou loto fesoasoani.
2. Alolofa i e mama'i.
3. Toaga e tatalo ia Iesu e fesoasoani mai.

TATALO:

Faafetai Tamā mo lenei aso matagofie, faafetai fesoasoani mai ia i matou le fanau. Alofa mai ina ia o matou iloa alolofa i tagata ma fesoasoani ia i latou ua manaomia le matou fesoasoani. Ona o Iesu. Amene

ASO SA: 14 IUNI 2015

MATAUPU: UA FESOASOANI FILIPO I LE EUNUKA.

SINI: Ia a’oa’o le vasega ina ia malamalama sa fesoasoani Filipino i le eunuka i le uiga o le tusi na ia faitauina.

TUSI FAITAU: Galuega 8: 26 – 35 (mo le Faiaoga)
Galuega 8: 34 – 35 (mo le Vasega)

FESOASOANI MO FAIAOGA:

O le Eunuka, o le upu lea e ta’u ai le auauna tama ua tofia faapitoa e galue i totonu o le maota o le Tupu Tamaitai.

O Filipino, o se tasi lea o so’o a Iesu na iloga le tele o ana galuega ma vavega sa faatinoina. Ae ona o le saua tele o Saulo i tagata ua talitonu iā Iesu, ua taitasi ma taapeape ai le au so’o ma ua amata ai ona salalau atu i tua atu o Ierusalemale le Talalelei ia Iesu Keriso.

Fai mai le tatou tala, sa fai le agelu ia Filipino, e ui atu i le auala e alu ifo mai Ierusalemale e agai i Kasa, o iina na iloa atu ai e Filipino le taavale o lo o tietie mai ai le eunuka, o se tagata Aitiope o ia, sa alu i Ierusalemale e tapuai, a’o lea ua toe foi i lona nuu. Sa faalatalata atu Filipino i le taavale ma ia iloa ai, o lo o faitau e le eunuka le tusi a le perofeta o Isaia. Ona valaau atu ai lea o Filipino i le eunuka, po o ia lagonaina le tusi ua ia faitauina.

Tamaiti, e lei malamalama le eunuka i le uiga o lana tusi la e faitau, ua ia lē mautonu foi, po o ai e faatatau ai lenei tusi, na fai le eunuka ia Filipino pe na te iloa o ai lea e faatatau ai le tusi a Isaia. Na oso loa Filipino i totonu o le taavale ma amata loa ona faamalamalama ma faamatala le uiga o le tusi a Isaia i le eunuka.

O Iesu lea na sauaina e ona tagata, lea e lei leva atu ona maliu. O ia lava lea o le Mesia lea e faatatau i ai le tusi a le perofeta o Isaia.

UIGA O UPU:

1. Eunuka - o le igoa e ave i auauna a tupu tamaitai
2. Kasa - o le igoa o le nuu
3. Aitiope - o le igoa o le nuu

(silasila i le itu i tua o le Tusi Paia i faafanua o i ai.)

GALUEGA FAATINO: SAILIGA UPU

Saili mai upu ia o le tatou Tusi Faitau i totonu o le paso (puzzle)

P	I	K	N	G	A	S	I	K	A	V	F	R
O	S	A	M	E	L	A	S	U	R	E	I	A
R	E	S	E	K	A	N	A	K	A	N	L	F
E	A	A	M	G	N	U	I	A	T	I	I	E
A	K	E	E	U	N	A	A	L	O	S	P	U
K	A	S	T	A	P	U	A	I	P	O	I	N
T	A	U	S	I	O	L	O	A	I	T	A	U
A	F	I	L	I	P	O	P	T	T	U	S	K
A	L	A	O	U	N	T	I	U	A	P	I	A
I	A	T	I	A	M	A	T	U	P	U	T	O

1. Filipino
2. Eureka
3. Ierusalem
4. Kasa
5. Aitiope
6. Kanake
7. Tupu Tamaitai
8. Auauna Sili
9. Tausi Oloa
10. Tapuai

PESE:

Go tell it on the mountains
Over the hills and everywhere
Go tell it on the mountains
That Jesus is His Name.

(Muamua: usu faatasi, alu faalua ma le faatolu:felafoa'i –: usu muamua teine seia oo i le laina lona lua ona amata lea o tama, faaii ai i le toe usu faatasi)

A'OA'OGA:

1. Fesoasoani i meaaoga a isi tamaiti
2. Toaga e faitau le Tusi Paia.
3. Toaga i le lotu ma le Aoga Aso Sa.

TATALO:

Iesu e, le uo a tamaiti, faafetai fesoasoani mai ia i matou. Faafetai mo Tamā ma Tinā, matua ma faiaoga i le latou tausiga ia i matou ma le a'oa'oina o i matou ina ia matou lelei. Ona o Iesu. Amene

ASO SA: 21 IUNI 2015

MATAUPU: O LO O IA TE I TATOU LE ATUA.

SINI: Ia a’oa’o le vasega ina ia malamalama e auai le Atua i tagata uma o e faatuatua ia te ia.

TUSI FAITAU: 2 Nofoaiga Tupu 32: 1 – 8 (mo le Faiaoga)
2 Nofoaiga Tupu 32: 7 – 8 (mo le vasega)

FESOASOANI MO LE FAIAOGA:

O Esekia, o le tupu lea o Iuta sa i ai i lena vaitau. Sa faalogo o ia, ua manatu Sanerivi le tupu o Asuria na te faoa Ierusalema e fai mona. O lea na faapotopoto ai e Esekia alii o le nuu faapea ma ana fitafita, e fai se tonu, i se auala e laveai ai le aai o Ierusalema mai lima o Sanerivi.

Fai mai na ō tagata o le nuu ua pupuni uma gutu o vaipuna ina ia aua nei toe tafe se vai i totonu o le aai po o le nuu. Ua latou toe fauina le pa na solo, toe ati olo ma toe fau le isi pa fou i tua atu o le pa tuai ma ua faatonu foi e Esekia fitafita ina ia gaosi ni tao ma talita se tele.

Ua maea uma ia tapenaga a le tupu o Esekia ma le nuu, ona tautala ai lea o Esekia e faamalosiua ma faamafanafana i ai latou, ona o le tupu lea o Sanerivi ua tele nuu tuaoi ua ia faoa ua tau fefefe ma faavaivai ai loto o tagata o Iuta.

Fai mai Esekia i le nuu, “Ia outou faamalolosi ma loto tetele, aua le fefefe, aua foi tou te matatau, e ui ina e toatele latou ae toaitiiti tatou, e faamoemoe Sanerivi i lima o ona tagata, ao tatou e fesoasoani le Alii lo tatou Atua ia te i tatou.”

Tamaiti tou te iloa la o le a le iuga o le tatou tala? Ioe, na manumalo le tupu o Esekia. So o se isi lava e faamoemoe i le Atua, e fesoasoani foi i ai le Atua. Ao Sanerivi le tupu o Asuria, tamaiti, na toe fasiotia lava e lana fanau ona ua lē fiafia ua latou le mauaina Ierusalema.

GALUEGA FAATINO: FAAFETAUI UPU SA’O

Tusi le laina mai i le Vaega A i lana upu sa’o i le Vaega E: (O lo o avatu le faataitaiga)

<u>VAEGA A</u>		<u>VAEGA E</u>
1. aeiksE	→	a. Tavita
2. viSairne		e. vaipuna
3. ausrAi		i. Iuta
4. aemruIsael		o. Esekia
5. autI		u. Sanerivi
6. tafiaift		f. Asuria
7. nupiava		g. Milo
8. naosisoafe		l. fesoasoani
9. loiM		m. fitafita
10. aTavit		n. Ierusalema

PESE:

1. Tumau i le Alii, aua e te popole
Na te le tuua oe, e faatasi mai pea
E ia te oe le manumalo moni
Pe a e valaau atu o Ia.

*Tumau, tumau, tumau I le Alii
Loto tele o loo ia taitaiina oe
Tumau, tumau, tumau I le Alii
Viia Ia mo lou manumalo.*

2. Ia e ofuina ofutau na Ia tuu mai
Faatuatua na te lē tuua oe
O Ia le sulu i ou ala uma
Le lafitaga mai ou fili fitā

3. Tumau i le Alii, aua e te popole
Na te faatoilalo i ou fili
Loto tele ua ia te oe le manumalo
Na te puipui i ou ala uma

A'OA'OGA:

1. O le Atua o lo tatou Fesoasoani sili.
2. O le Atua e puipuia i tatou mai soo se faalavelave.
3. Valaau i le Atua e ala i le tatalo poo le pese e te malosai ai.

TATALO:

Faafetai Iesu mo lenei aso fou. Faafetai i lou tausii mai i le po. A o'u feagai ai ma aoga ma feau, laveai mai lo'u ola. Faamanuia ia Tamā ma Tinā, faiaoga ma o'u matua, lo'u aiga ma a'u uo. Ona o Iesu lo'u Faaola. Amene

ASO SA: 28 IUNI 2015

MATAUPU: UA TOE ATAMAI NEPUKANESA.

SINI: Ia a’oa’o le vasega ina ia malamalama o le poto ma le atamai o meaalofa ia mai le Atua.

TUSI FAITAU: Tanielu 4: 34 – 37 (mo le Faiaoga)
Tanielu 4: 34 (mo le Vasega)

FESOASOANI MO LE FAIAOGA:

O Nepukanesa o le tupu lea o le nuu telē po o le malo lea o Papelonia. O le tupu ua maoa’e tele lona malosi. Ua avea lava lona malosi ma auala ua manatu ifo ai lava o ia, o ia ua tele lona poto ma lona iloa, ua tele mea ua na ia maua. Ua tele ana tupe, tele auro, tele fale, tele foi ana auauna. Ua faamaualuga lava lona loto ae peitai, ua lagona lava foi lona popole ona o lana miti sa fai ae na te leiloa po o le a lona uiga, o lea sa taumafai ai Tanielu le auauna a le Atua Soifua e faamatalatala le uiga o lana miti.

Sa apoapoa’i ma fautua Tanielu i le tupu ina ia tuu le faamaualuga o lona loto ma ia tuu ana agasala ona lē faasalaina ai lea o ia e le Atua, ae peita’i e lei usita’i le tupu i upu a Tanielu. Ua atoa le tausaga talu mai le miti lea a le tupu ona faasalaina ai lea o ia e le Atua. Ua tulia ese o ia mai le nuu o tagata, ae alu o ia i le vao ma ua nonofo faatasi ma manu, aai faatasi ma povi i le mutia, susū lona tino i le sau mai le lagi ma ua tutupu ai lona laulu pei o fulu o le aeto ma ana atigi lima ma vae ua pei o atigivae o manu felelei.

Ua atoa le fitu tausaga o ola ai Nepukanesa i le vao ona salamō ai lea o ia, ua toe atamai o ia ma ua ia iloa ai o le Atua o lo o soifua o Ia e faavavau, e silisili ese foi o Ia. Ona ia faafetai ai lea ma vivii ma faaneenee atu i le Atua. Na toe amia Nepukanesa e lona nuu ma ua toe avea ai o ia ma tupu o Papelonia.

GALUEGA FAATINO: FESILI MA TALI

1. O ai Nepukanesa?

Tali: O le tupu o Papelonia

2. O le a le galuega a Tanielu na faia mo Nepukanesa?

Tali: Na ia faamatalaina lana miti ma apoapoa’i ia te ia

3. O le a le mea na tupu ia Nepukanesa ina ua mavae le tausaga?

Tali: Na aveesea e le Atua lona atamai ae alu e nonofo faatasi ma manu i le vao

4. O le a le mea na oo ia Nepukanesa ina ua uma le fitu tausaga?

Tali: Na toe atamai o ia, ua ia iloa le Atua, ona ia faafetai ai lea ma vivii atu i le Atua

PESE:

1. All to Jesus I surrender
All to Him I freely give
I will ever love and trust Him
In His presence daily live
2. All to Jesus I surrender
Humbly at His feet I bow
Worldly pleasures all forsaken
Take me Jesus, take me now
- TALI: I surrender all, I surrender all
All to Thee my Blessed Saviour
I surrender all*
3. All to Jesus I surrender
Lord, I give myself to Thee
Fill me with thy love and power
Let thy blessing fall on me.

A'OA'OGA:

1. O le Atua na te aumaia le potu ma le atamai
2. Usita'i i matua e te manuia ai
3. Ia e maua le lotu maualalo

TATALO:

Iesu e, lē ōu le potu ma le atamai, a'o o'u sauni atu i a'oa'oga, aumaia le lotu matala e fai ai a'u sauniuniga. Ia e faatupuina le onosai ia te au e faia ai a'u mea aoga i le faamaoni. Ia faamanatu mai e lou Agaga Paia mataupu sa a'oa'oina. Iesu e, foa'i mai lau meaalofo o le atamai, ina ia suamalie ia te au le sailiga o le potu. Ia taumamao i lo'u mafaufau le faia o ni togafiti, e maua ai togi lelei. Ia viia lau Afio ma ia ou maua le fiafia i faaiuga manuia o le ola a'oa'oina. E ala iā Iesu le Faiaoga Sili la'u tatalo. Amene.

MANATU TAIALA O IULAI : UA TOILALO SATANI

Ua 'au'au manatu o lenei masina ia satani le fili o tagata uma, o ia lea ua leaga ai le lalolagi ma taumafai pea e faaleaga i tatou, ae ua ta'ua e le Tusi Paia lona toilalo popo i le mana ma le malosi o le Atua, e lē mafai ai e ia ona manumalo ia i tatou.

ASO SA : 5 IULAI 2015

MATAUPU: E LEAGA LE OLA FAAOSOOSO.

SINI: Ia a'oa'o le vasega ina ia malamalama i le matautia o le ola faaosooso.

TUSI FAITAU: Kenese 3:1 – 14 (mo le Faiaoga)
Kenese 3:12-14 (mo le Vasega)

FESOASOANI MO FAIAOGA:

O manatua e tatou tamaiti aisea na agasala ai le uluai tagata? Ioe, ina ua faaosooso e le gata le fafine o Eva e ai le fua o le laau na faasāina, lea na ai atu ai ma Atamu, ma agasala ai loa i la'ua i luma o le Atua, ona o le taufaaosooso o lenei gata. Sa tataua ia Atamu ma Eva ona faalogo ma usitai i le faatonuga mai le Atua. Ae peita'i, ua fai si malosi o le ola faaosooso o le gata, lea e masani ona faaigoa o le tiapolo.

Ua matua faasee ma tauanau e le gata le fafine, ina ia faasesēina. Na i'u ina seetia Eva i upu a le gata, ona ia tago ane ai lea ma ai loa le fua o le laau na faasaina mai e le Atua. Ua leai se aoga ua soli le tulafono, ua na avatu foi i lona toalua o Atamu, ua atili ai ona faigata. Ua silafia e le Atua ua soli e Atamu ma Eva lana tulafono, ona afio mai lea o Ia i le faatoaga, ua na valaau ia Atamu ma Eva. Na lagona e i la'ua lo la le usita'i, ua fefefe foi i la'ua i le siufofoga o le Atua, ma na la tali atu ai i le Atua o le gata na ia faaosooso mai, ma na avatu ia te i la'ua la te aai ai. O iina na faasala ma ai e le Atua i latou uma, ona o le ola faaosooso o le gata, ma le le usitai o Atamu ma Eva. O le faasalaga o le gata e pei ona i ai i le Tusi Faitau, "E sili lou malaia i manu vaefa fanua uma, ma manu vaefa uma lava o le vao, e te sosolo i lou manava, o le efuefu e te ai ai i aso uma o lou ola."

Tamaiti, ua matua malaia lava le gata i upu na tuu i ai e le Atua, sosolo i le manava, e ai i le efuefu i aso uma o lona ola. Ua tatou talitonu la i le leaga o le ola taufaaosooso ma lona tau i maua mai ai. Auā pe ana lē faaosooso e le gata Eva e ai i le fua o le laau, semanu e lē pa'i lava Eva ma Atamu i le laau faasāina. Ua a'oa'o mai mo i tatou foi, 'aua tatou te fiafia e faaoso isi tagata e fai le mea leaga, pe faatupu ni vevesi, auā e lē fiafia mai ai Iesu ia i tatou, ma faamalaia mai ia te oe ma a'u i aso uma o lo ta ola.

UPU FAAMALAMALAMA:

1. siufofoga - o le leo, tautalaga po o se taualaga a se tagata.
2. efuefu - o le palapala mago pito i luga o le elelee.

GALUEGA FAATINO


- (i) Manaia si va'aiga lenei ae faatino e le vasega: O se isi e fai ma gata, Atamu ma Eva, ia ma se isi e fai ma fofoga o le Atua.
- (ii) Fa'aali lea iai ma le ata o le Mataupu.

A'OA'OGA:

1. E i'u leaga le ola taufaaosooso.
2. Aua le fiafia e faasese isi tagata.
3. Ta'u le mea sa'o i le isi ou uso a tagata..

TATALO:

Le Alii e, lo matou Tamā, aua foi e te ta'ita'iina i matou i faaosoosoga, a ia e lavea'i ia i matou ai le leaga, auā e ou le malo ma le mana, atoa ma le viiga e faavavau lava. Amene.



UA FAAOSOOSO E LE GATA EVA E 'AI LE FUA O LE LAU

ASO SA: ASO 12 IULAI

MATAUPU: UA TOFOTOFO E SATANI IESU.

SINI : Ia a'oa'o le vasega ina ia malamalama, sa taumafai le tiapolo e tofotofu Iesu, ae le i manumalo ai.

TUSI FAITAU: Luka 4: 10-13 (mo le faiaoga)
Luka 4:1 - 13 (mo le vasega)

FESOASOANI MO FAIAOGA:

O le mataupu lenei tamaiti ua iloga i le Tusi Paia, e uiga i le faaososoina o Iesu e Satani po o le tiapolo. Fai mai la tatou tala na faitauina, na ave Iesu e le Agaga Paia i le vao i le mea tuufua. Ua atoa le fasefulu o aso e le'i taumafa o ia, ua lagona e Iesu le fia taumafa ona alu ane lea o le tiapolo ma fai ane, afai o oe o le Alo o le Atua, ina fetalai ane ia i lenei maa ia liu areto. Ona tali atu lea o Iesu, 'Ua tusia, e le na o mea e ai e ola ai le tagata.....'

Ua uma lenei, ona toe alu ane lea o le tiapolo, ma fai atu ia Iesu, afai e te ifo mai ia te au, ou te avatu ia te oe malo uma o le lalolagi ma lona matagofie; ae peitai, ua tali mai foi Iesu, 'e te ifo atu i lou Alii lou Atua, ua na o ia lava e te auauna i ai.'

Ua uma foi lenei, ona ave ai foi lea o Iesu e le tiapolo i luga o le tumutumu o le malumalu i Ierusalem, ma fai ane ia te Ia, afai o oe o le Alo o le Atua, ina oso ia oe i lalo, aua e avae oe e agelu ne'i tu'ia lou vae i se maa. Ona toe tali atu ai lea o Iesu, 'ua fai mai le upu, 'aua e te tofotofu i le Alii lou Atua.' Ua uma nei faaososoga uma e tolu tamaiti, ua lē mafai e Satani ona manumalo ia Iesu, ona alu ese ai lea o ia mai ia te Ia, auā ua faiaoga o ia.

Tamaiti, ua matua fiu Satani e faaososoga Iesu ma tau su'e se mea e leaga ai Iesu. Ae po o le a le fia taumafa o Iesu ma lagona lona vaivai, ae na ia taumafai lava e taofi le mamalu o lona Tamā, nei tei ua ata ee satani, pe afai e seetia gofie i mea ua ia fofola mai. O se lu'i foi lea mo i tatou i lenei taeao. E tele taimi e ono faaososoina ai i tatou e Satani. A'e iloa ua e fuafua e fai se mea leaga, e aafia ai lou aiga, o au uo, ma isi tagata pei o i tatou, o lona uiga, o lona uiga o lea o Iesu e Satani. 'Aua le faia fua se mea e le'i faatonuina ai oe e ou matua, e lou faiaoga, ma lou faifeau e fai. 'Aua foi e te alu fua faaososoga le isi tamaiti i mea e le lelei ma mea leaga. Auā e lē fiafia mai ai Iesu ia te oe. Tatou faamoemoe i le Atua, ua na o Ia tatou te maua ai mea lelei uma lava tatou te manana'o ai. O Ia foi tatou te ava ma fa'aaloalo i ai i taimi uma, e ala i mea tatou te faia i lalo nei.

UPU FAAMALAMALAMA:

1. tuufua – ua gaogao ma avanoa
2. tiapolo – satani/o le fili/tevolo
3. tofotofu – su'esu'e faalilolilo, iloilo
4. faaososoina – taumafai e faasese, manao e fai se mea leaga i le isi tagata

GALUEGA FAATINO : FAATINO GA PUUPUU

1. Tofu paga le vasega. Tofu le paga ma le faaososoga, po o le faaososoga 1,2 po o le 3.
2. Tuu i ai se tolu minute i paga ua tofia, e Iesu le isi ae Satani le isi. Faasolo le faatinoga.
3. E mafai ona faasolo, ia oo uma paga i faaososoga e tolu, a i ai se isi e ova e mafai ona paga ma lau susuga i le faiaoga.


PESE: Sa ou alu atu ia satani fao mai a'u mea totino.

A'OA'OGA:

1. E iloa gofie lava faaosoosoga i mea e leaga ai.
2. Aua le fiafia e tofotofo pe faaosooso isi tagata.
3. Ia ava ma mata'u i le Atua.

TATALO:

Le Alii e, faafetai mo lou lavea'i mai i taimi e faaosoosoina ai i matou, ae ua o matou tatalo, 'aua e te ta'ita'iina i matou i faaosoosoga ma lavea'i mai i matou ai le leaga, auā e ou le malo ma le mana, atoa ma le viiga e faavavau lava; Amene



UA FIU SATANI E FAATOILALO IESU AE LĒ MAFAI

ASO SA: 19 IULAI 2015

MATAUPU: UA LĒ USITAI IONA I LE ATUA.

SINI: Ia a'oa'o le vasega ina ia malamalama, na feagai Iona ma puapuaga, ona o lona lē usita'i.

TUSI FAITAU: Iona 1:1 – 4

FESOASOANI MO FAIAOGA

Manaia ae amata i fesili masani e uiga ia Iona, e tomua ai le mataupu. Ft. O ai foi na folo e le i'a tamaiti? E fia po fia ao na i ai Iona i le manava o le i'a?

O Iona lona tamaiti lea o le a aga'i i ai la tatou mataupu o lenei taeao. Fai mai ua oo mai le afioga po o le manao o le Atua ia Iona le atalii o le tagata e igoa ia Amitai, ua faapea mai, Iona, ina tulai ia ma alu i le aai tele ua igoa o Nineva, ma alaga atu i ai, ua oo mai a latou agasala i o'u luma.

Ua faalogo Iona i lea feau, ona tula'i lea o ia ma alu atu i le nuu o Iopa, ma pu'e ai le vaa e sola ai i Tasesa, ai luma o le Atua. Ua na tuu foi le totogi o le vaa, ma malaga faatasi ai ma i latou e o i Tasesa. O le sola ese mai o Iona tamaiti, o le faailoga e iloa ai lona le usita'i, ae o lona uiga e i ai le mafuaaga ua mafua ai ona le fia alu Iona e faataunuu le finagalo o le Atua. Tou te iloa la outou tamaiti, ua tuuina ifo e le Atua matagi tetele ma ua sou ai le sami, ua matuā lē mafai ai lava ona alu le vaa, semanu a malepe i le mata'utia o lenei matagi na faafuaseia ai i latou. O le uiga la o le tala i lenei taeao, o le taimi lava e le usita'i ai le tagata i le Atua, ma fia sola ese pe fia tofotofa i le Atua, e mautinoa lava e le taunuu i se lelei, ae feagai ma mala ma puapuaga o le ola. O lona uiga e tusa lava pe le manao le tagata i le mea ua finagalo i ai le Atua, e tataua lava ona alu e faataunuu. O le Atua e alofa ma faamaoni, e tumu i le faapalepale i ona tagata, ae sili foi lona mata'utia, pe a tofotofa i ai le tagata. Tamaiti o la tatou mataupu lona o lenei taeao, o a ni aoaoga o le mataupu mo i tatou foi? Ioe, e leaga le ola le usita'i i le Atua, e amata atu i ou matua ia tamā ma tinā, o lou aiga, o lou faifeau ma e matutua, o le a le faatonuga ma se feau ua faatonuina ai oe e te alu e faatino, onosai e fai, auā fai mai le upu, e sili le usita'i nai lo le ga'o o le mamoe po'a. E tigaina lava lona faatinoga, ae a uma ane, ona fiafia ai lea o Iesu ia te oe, ona o lou ola ususitai ma ava i matua. O lona uiga toaga e tatalo ma mafuta i le Alii, faamoemoe ia te ia e fesoasoani mai i lou vaivai, e maua ai e oe le malosi e fai ai so o se mea e tofia ai oe. Ae 'aua tatou te pei o Iona, e fai mai le faatonuga ae sola ese e lē fia usita'i, e na'o puapuaga lava ma mala le mea e oo mai ai. Ia manuia tele outou le fanau.

UPU FAAMALAMALAMA:

1. Amitai - tama o Iona
2. Nineva - o le aai tele ua tumu i le agasala.
3. Tasesa - o le nuu na tau sola i ai Iona
4. Iopa - o le nuu na pu'e ai le vaa o Iona
5. lepetia - malepe, faaleaga

GALUEGA FAATINO: FAAFETAUIGA O AMATAGA MA FAAI'UGA O FUAI'UPU.

1. Ua oo mai le afioga a le Alii - ua oo mai a latou agasala i ou luma
2. Alu i Nineva ma ta'u i ai - ma na maua ai le vaa e alu i Tasesa
3. A ua tulai Iona - semanu a lepetia ai le vaa

4. Ua alu ifo o ia i Iopa - ma sola i Tasesa
5. Ua tuuina ifo e le Atua matagi tetele - ia Iona le atalii o Amitai

PESE: Faalogo ma usita'i e leai se isi ala..

A'OA'OGA

1. E le mafaia e se tasi ona sola ese mai luma o le Atua.
2. E sili le usita'i nai lo isi mea tiga e mulimuli mai ai.
3. Ia ava i le Atua e manuia ai lou ola.

TATALO

Faafetai tele le Atua i lou le aunoa ona faamanatu mai, e ao ina o matou faalogo ma usita'i i aso uma o lo matou ola, ia a'oa'o mai pea i matou ina ia tumau i o matou loto le usita'i i o matou matua ma faalogo i ai, ae sili ai ona mata'u i lau Afio matou te manuia ai, Amene.



UA FIU IONA E SOLA MAI LE ATUA AE MAUA LAVA

ASO SA: 26 IULAI 2015

MATAUPU: UA TULIA E IESU TEMONI.

SINI: Ia a'oa'o le vasega ina ia malamalama o le mana o Iesu, na te tutuli ese ai temoni i le tagata ma'i.

TUSIFAITAU: Mareko 5: 9 -13

FESOASOANI MO FAIAOGA:

O le a foi le mea e ta'u o temoni tamaiti? E iai se isi upu e tutusa ma lea upu? Ioe, o le upu temoni, e masani ona faaigoa o agaga leaga, poo le tiapolo, lea foi e faaigoa e nisi o le aitu. Ailoga ua iai se isi ua vaai i lea mea e ta'u o le temoni? Se'i vagana lava fai mai nisi talitonuga e iai lava temoni i le lalolagi lenei tatou te iai.

O le tala na tatou faitauina, ua fetaia'i Iesu ma le temoni ua tino mai pei o se tagata. Ua fesili atu i ai Iesu, poo ai lona igoa, a ua tali mai o ia o Lekeono, o le igoa lea o au e ono afe, ua ia fai mai ai ia Iesu, e toatele i latou o temoni. Ua ia matua aioi ane ia Iesu, ia aua nei ia aueseina i latou mai lea nuu, ae ia e auina atu i matou i puua matou te ulutino ai. Fai mai ua silasila atu Iesu i le lafu puua tele, ona ia tutuli atu lea o ia temoni ina ia ulutino i puua, ona feosofi ai lea o ia puua i le tofe po o le vanu, pe atoa le lua afe o puua, ma ua malelelmo ai i le vai. E foliga mai ua iloa lelei e temoni le mamalu o Iesu ma lona malosi ma le mana, ua usiusita'i mea uma lava ia te ia, e oo lava i agaga leaga.

Tamaiti, e leai se isi malosi poo se isi mana na te mafaia ona tetee atu i le mana o Iesu, o le mana lava lea o le Atua, e oo lava i taulaitu po o temoni po o ai lava, e leai lava se mea e tasi na te mafaia le mana o le Atua Silisili Ese. O le mea lea e ao foi iai tatou tamaiti ona o tatou talitonu ma faamoemoe i le mana lea o Iesu, o ia na te puipui ma lavea'i mai i so o se taimi ma so o se aso. E oo lava foi i le pogisa o le po tatou te feoai ai, o loo lama mai le fili ma le tiapolo ia te i tatou, ae a tatou faamoemoe ma mafaufau i le Alii i lona mana e faatasi ai ma i tatou, e leai lava se mea tatou te toe popole ai. E tusa lava pe fai mai e iai aitu po o temoni, na'o le suafa lava o lo tatou Alii o Iesu Keriso na te mafaia ona tutulieseina ia agaga leaga ma i tatou, ae faaola mai i tatou uma. Toaga la'ia e mafuta i le Alii ma faamoemoe ia te ia, e ala i le tatalo, tatou te malolosi ai.

UIGA O UPU MA FUAITAU:

1. Lekeono - o le igoa lea o au e ono afe
2. aueseina - tuli ese, auina ese atu
3. ulutino - o se agaga e ulu i se tagata e tino mai ai

GALUEGA FAATINO: TALIGA FESILI

1. O le a lea mea e ta'u o temoni?
2. O ai le igoa o le temoni na talanoa ma Iesu?
3. O le a le augani a le temoni ia Iesu?
4. E faapefea ona faaalua le malosi o le mana o Iesu?
5. O le a le manu o lo o taua e tutusa ma a tatou manu?

TALI:

1. *O agaga leaga po o aitu i le lalolagi nei*
2. *O Lekeono*
3. *Aua nei aaueseina i latou mai lea nuu, ae aaaina atu i matou e ulutino i puaa.*
4. *Ua ia tuliese temoni ma faaulutinoina i puaa, ua feosofi foi puaa i le vanu ma malelemo ai.*
5. *O puaa*

PESE: Na ou alu ia Satani, fao mai au mea totino.

AOAOGA:

1. E mafaia e le mana o Iesu mea faigata.
2. E fefefe agaga leaga ia Iesu.
3. Talitonu ma faatuatua i le mana o Iesu na te mafaia mea uma tatou te mafatia ai.

TATALO:

Le Alii e, ia tumau i le lagi ma le lalolagi nei lau pule aoao e faavavau, Amene.



UA TULIA E IESU TEMONI MA ULUITINO I PUAA

MANATU TAIALA O AOKUSO: FA'AALI NEI LOU ALOFA

O le 'au'au lenei o lenei masina, auā ua o tatou pepese i le alofa mai o le Atua ia i tatou ma le lalolagi, ae faapefea i tatou, o le a se tali atu a le tagata i le alofa. E tele auala e mafai ona o tatou tali atu ai i le Atua ma lona alofa faamaoni, faapei ona vaaia i le Tusi Paia, aemaise o le alofa atu o le isi tagata i lona tuaoi.

ASO SA: 2 AOKUSO 2015

MATAUPU: O REPEKA MA LANA TAMA O IAKOPO.

SINI : Ia a'oa'o le vasega ina ia malamalama i le alofa o Repeka iā Iakopo.

TUSI FAITAU: Kenese 27: 1 – 46 (mo le Faiaoga)
Kenese 27: 6 – 10 (mo le Vasega)

FESOASOANI MO FAIAOGA:

O le aiga lenei tamaiti, o le toeaina o Isaako ma lona toalua o Repeka, e toalua si a la fanau, o le masaga tama e igoa ia Esau ma Iakopo. E pei e pele i le toeaina lona atalii matua o Esau, a'o loomatua, e pele ia te ia le tama laititi o Iakopo. O Esau, o lona tino e taifulufulua lea, a'o Iakopo, o lona tino e lamolemole. Sa iai se tasi aso, na faalogo atu ai Repeka o fai le tala a le toea'ina o Isaako i lona atalii o Esau, e alu e fana mai se manu mai le vao, e kuka lelei mai sei fai ai sana meaai, ona ia faamanuia mai lea ia te ia. Ona faaosolea e Repeka o lana tama o Iakopo, e alu i le fagaga ma aumai ai ni tamai oti lelei se lua, na te kukaina ai se meaai lelei ma le toeaina, ina ia faamanuia mai Isaako ia te ia, ae le o Esau. Na faigata ia Iakopo lenei mea, aua o le tino o Esau e taifulufulua, a'o ia e lamolemole, e iloa gofie e le toeaina pe a tagotago mai ia te ia, aua ua tauaso ona mata. Na tauanau pea e Repeka lana tama ona o lona alofa ia te ia, na ia fai atu i lana tama, ia i luga ia te au le fetu'u a le toeaina, po o ana upu faamalaia, ae tau lava o lou usita'i ma faalogo mai i la'u upu. Tamaiti e ui lava e pei o se togafiti le mea ua faia e Repeka i lana tama, ae o iina tatou te iloa ai le alofa faaalua o le tinā o Repeka i lana tama o Iakopo, lea lava na iu ina faamanuia i ai Isaako iā Iakopo ona o Repeka.

E faapena foi le alofa o o tatou tina tamaiti, e tiga lava mea faigata e saisaitia ai i tatou, ae taumafai lava tinā e su'e se auala e laveaiina ai i tatou ma faasaoina. E tiga lava foi lo tatou le ususitai ma le faalogogata, e faia lava e tina mea silisili mo i tatou, ina ia o tatou ola manuia. O le a sau tali atu? E mana'omia foi lou alofa atu, usita'i, faalogo ma alo ese i faaososoga a isi tamaiti e faaleaga ai i tatou, ma tatou toaaga i le lotu, ma toaaga e faitau le Tusi Paia ma tatalo i taimi uma, e maua ai lo tatou fesoasoani sili, ma o tatou ola manuia ai e toe totogi atu le alofa mai o tinā.

UIGA O UPU MA FUAITAU:

1. fagaga - o le nofoaga o i ai manu e aai ai ma momoe ai, e pei o puua.
2. fetu'u - o ni upu e faamalaia ai se tagata faalogogata ma le lē usitai.

GALUEGA FAATINO: AVANOA FAATUMU

Fili le upu sa'o e faatumu ai avanoa o i lalo
togafiti, fana, tama, Repeka, tausami, masaga, Esau, uii.

O Isaako ma _____, e i ai la la'ua _____ tama, o _____ le ulumatua, ma Iakopo le _____. E alofa le loomatua ia Iakopo, a'o le toeaina ia Esau. Na tuli Esau e _____ mai se manu, ae foi mai, ua uma ona _____ lona tamā, ona o le _____ a Repeka ma lana _____.


PESE : Sau ia Esau lo'u atalii pele ina alu ma lau aufana.

A'OA'OGA:

1. E alofa moni Repeka i lana tama.
2. E taua le ola usitai.
3. Alofa mai matua, tali atu foi i ai i le alofa.

TATALO:

Faafetai le Atua ua matou faalogo i le alofa faatinā i lenei taeao, ae ua matou augani atu se i faamanuia i nai o matou tinā ma ia saga maua pea la matou mafutaga fiafia e faavavau, Amene.



UA TOGAFITI POTO REPEKA, MA MANUIA AI LANA TAMA O IAKOPO.

ASO SA: 9 AOKUSO 2015

MATAUPU: UA TALITONU SAULO IA IESU.

SINI: Ia a'oa'o le vasega ina ia malamalama i le liliuina o Saulo e fai ma tagata ua talitonu i le Alii.

TUSI FAITAU: Galuega 9 : 1- 22 (mo le Faiaoga)
Galuega 9 : 20-22 (mo le Vasega)

FESOASOANI MO FAIAOGA:

Tamaiti, o le tagata leni o Saulo, o se tagata leaga ma le sauva tele, o lana mea fiafia o le sasa lea o tagata Kerisiano ma faatigaina. O ai lava o fiafia e ta'uta'u le suafa o le Alii ma tala'i mai tala e uiga ia Iesu Keriso, o tagata na e ita tele i ai Saulo. Ua oo i le tasi aso, ua ui atu Saulo ma e na ia te ia i le ala i Tamaseko, e o e pu'e ma saisai mai le au Kerisiano e faapologa ma sauaina, fai mai ua faafuasei ona taia o ia i le pupula o le malamalama mai le lagi, ona pau lea o ia i lalo ma 'ua tauaso ona mata. Ona faalogo atu lea o ia i le alaga ua faapea mai, "Saulo, Saulo e, se a le mea ua e sauva mai ai ia te au?" Ua tali atu Saulo, "Le Alii e, o ai ea oe? O a'u o Iesu ua e sauva mai i ai, o le mea faigata ia te oe ona aa i tui." Ua aoa'i e le Alii Saulo i le leaga o lana mea ua fai, ma ua sui ai loa lona igoa, ua le toe igoa o ia ia Saulo, a ua sui ia Paulo, o le faamoemoe e alu e talai le tala lelei i nuu ese. Ua lagona e Paulo i lona loto lona alofa i le Alii o Iesu Keriso, ua ia lagona lona faatauva ma lona le mafaia o se mea ina ua fetia'i ma le Atua. Tou te iloa la tamaiti, na toe faapupula e le tagata e igoa ia Anania mata o Paulo, ona tula'i loa lea o ia ma le alofa, ua ia tala'i atu le Tala Lelei e uiga ia Iesu Keriso. Ua ia lauga atu i tagata, ua ia folafola atu le suafa o Iesu Keriso le Alii Faaola, ma ia fealuai e tala'i atu le Tala Lelei i nuu ese, e tusa ai ma le finagalo o le Atua. E tele tigā ma faigatā na oo ia Paulo, ma tele mai tala a tagata ma lamatia lona ola, ae na ia alu lava ma le fiafia tele, e faatino le feau ua tofia ai, ona o lona alofa ia Iesu ma lana Tala Lelei. O se lu'i lelei foi lea mo i tatou tamaiti, taumafai e sui o tatou olaga, ua faamoemoe mai ou matua ia te oe e te usita'i ma faia mea lelei uma, ua faamoemoe mai Iesu e fai oe ma ana avefeau i le lumana'i, ia maua pea e i tatou le alofa ma le talitonu, e mafaia ai ona o tatou faia mea ua finagalo ai le Atua mo i tatou.

UPU FAAMALAMALAMA:

1. sunako - malumalu / falesa
2. fememea'i - popole, le mautonu
3. faaalitino - faailoa, faamanino

GALUEGA FAATINO: FAATINOGA

Manaia si tala leni ae faatino e tamaiti o le vasega, o se isi e fai ma Paulo i le taimi ua malaga ai ae taia loa i le ala, o se isi e fai ma siufofoga o le Alii, ma se tasi e fai ma Anania na te faapupulina mata o Paulo, ona alu loa lea o Paulo e lauga ma tala'i atu le suafa o le Alii i tagata.

PESE: Ua ou filifili e mulimuli ia Iesu

A'OA'OGA:

1. Fa'aaoga tataua suiga ua aumai e le Alii.
2. E sili a le alofa ia Iesu nai lo se isi lava mea o le ola nei.
3. 'Aua le fia malosi.

TATALO:

Le Atua e faafetai i suiga e te faia i isi tagata i o latou olaga, e sui ai foi i matou ma o matou foi olaga, alofa ma fesoasoani mai pea ina ia tele ni suiga lelei mo i matou, Amene.



O LE A'OA'IGA O SAULO NA ALOFA AI LOA IĀ IESU

ASO SA: 16 AOKUSO 2015

MATAUPU: O LE ALOFA O TAVITA IA SAULO.

SINI: Ia a'oa'o le vasega ina ia malamalama i le faatinoga o le alofa o Tavita iā Saulo.

TUSI FAITAU: 1 Samuelu 24: 1 - 15 (mo faiaoga)
1 Samuelu 24: 8 – 11 (mo le vasega)

FESOASOANI MO FAIAOGA:

Ua iloa foi e outou tamaiti o ai foi lenei tagata o Tavita? A'o ai Saulo lea ua ta'ua i la tatou Mataupu? Ioe, o Tavita lea e faalogo soo i ai tatou, o ia o le leoleo mamoe, o le ta kitara, ia po o ia foi o le tupu o Isaraelu. A'o Saulo, e ese mai ia Saulo lea na tatou talanoa ai le vaiaso talu ai, o Saulo lenei i le Feagaiga Tuai, o le tagata muamua lava lea na filifilia e avea ma tupu muamua o Isaraelu, ona soso'o ai lea ma Tavita, le atalii o Iese le Peteleema. Fai mai ua leva ona lamalama e le tupu o Saulo si tama o Tavita i se mea e fasioti ai, aua ua iloa e Saulo ua uma ona faauu Tavita e fai ma tupu, o se tagata e poto e tau, a'o se tagata foi e feoa'i faatasi ma le Atua, e faamanuia i ai le Alii, aemaise ua fiafia uma foi tagata ia Tavita nai lo Saulo. Ua iloa e Tavita ua lamalama pea ia e Saulo, o lea na ia sola ese mai ai ma agai atu i le mauga e lafi ai, ua agai atu foi Saulo ma ana auauna e saili ia te ia. E le'o matua iloa lelei e Tavita, pe aisea lava ua naunau ai Saulo e fasioti ia te ia. Fai mai ua i'u ina mapu Saulo ma ana auauna i le ana e igoa o Enokati, ona tolotolo atu lea o Tavita ma sesele ese mai le pito ofu o le ofu o Saulo, e aunoa ma se isi mea na ia faia ia te ia. Ona toe sau lea o Tavita ma valaau atu ia Saulo i le isi itu, ua tepa atu Saulo i ona tua, ona ifo lea i lalo o Tavita ma fai atu, po o le a le mea ua na faalogo ai fua i upu a tagata ua tupu ai pea lona ita ia te ia. Ua ia fai atu foi, o le aso lenei na aumai ai e le Alii oe ia te au e fasioti, a o au ou te alofa ia te oe, leaga o oe o le auauna faauuina a le Atua, ou te lē faaoo lo'u lima ia te oe lo'u alii. Vaai foi oe i lou pito ofu lenei, na ou sesele ese mai, ae ua ou le fasi ia te oe, ia e iloa ai ou te lē fouvale pe ou te agaleaga ia te oe.

Tamaiti o upu uma nei e iloa ai le alofa o Tavita ia Saulo, e iloa ai lona ava i lona alii, aua o le tupu na faauuina e le Atua. O le i'uga o le tala tamaiti, na matua tagi Saulo ona ua iloa e alofa faamaoni Tavita ia te ia. Se mea ina manaia o le agaleaga mai ae alofa pea i ai, o le tagata e faufau leaga ma ola taulamalama, e leai ma se mea lelei na te maua, na 'o puapuaga lava ma malaia mea e oo mai ai. O se a'oa'oga aogā foi lea mo i tatou tamaiti, po o le a le ita ma le taulamalama mai o isi tagata ia te outou tamaiti, taumafai pea i tatou e alolofa i ai ma faamagalo faapei o le mea na faia e Tavita. 'Aua lava le fia tau ma sui e leai ma se mea e maua ai na o le atili ai lava ona pisa ma tulai mai ai nisi faafitauli, e faitalia lava le Atua ma le tagata e ola taulamalama.

GALUEGA FAATINO: GALUEGA TULITULILOA

Toe tusi mai ni au fuaiupu se fa mai le tala e faamaonia ai le alofa o Tavita ia Saulo. ft. Ua punou Tavita i lalo ma ifo atu ia Saulo.

PESE: Love is somethinga that you give it away
O le alofa o se mea e te faasoa atu.

A'OA'OGA:

1. E taua le alofa nai lo le itaita pea.
2. Agaleaga mai faamagalo i ai.
3. Ia ava i auauna faauuna a le Atua.

TATALO:

E fiafia pea e a'oa'oina i matou i le taua o le loto faamagalo atu i ē ita mai, alofa ma fesoasoani mai i lo matou ola lamatia, a ia maua pea e i matou le loto faamagalo mai lau Afio, Amene.



AGALEAGA MAI SAULO, AE ALOFA ATU PEA I AI TAVITA

ASO SA: 23 AOKUSO 2015

MATAUPU: UA TALIA IESU E SAKAIO.

SINI: Ia a’oa’o le vasega ina ia malamalama i le taliaina o Iesu e Sakaio i lona fale.

TUSI FAITAU: Luka 19: 1 – 10

FESOASOANI MO FAIAOGA:

Faa-tulai le vasega ae usu le pese lea ma fai taga: ‘Sakaio le tagata puupuu saasaa’

O Sakaio o lo o ta’ua i le pese o le tagata puupuu saasaa, o lana galuega e alu e ao mai lafoga po o tupe e ave ma le malo o Roma. O lana masani na te ao faasili tupe a tagata ina ia maua ai ma ni ana foi tupe, o le mea lea e igoa ai foi o ia o le tagata gaoi po o le tagata agasala. Na faalogo loa Sakaio ua maliu ane Iesu i le nuu lea o Ieriko, ona alu ane lea o ia e fia matamata ia Iesu. O le tumutumu tele o tagata na le iloa atu ai e Sakaio Iesu i lona puupuu saasaa, o lea na ia a’e ai loa i luga o le laau o le sukamoru. Ua silafia e Iesu o ia, ona valaau atu lea o Ia ia te ia, “Sakaio e ia e vave ifoifo ia i lalo, aua e tatau ona ou nofo i lou fale i le aso nei.” Ua lagona e Sakaio ia upu a Iesu, ona vave alu ifo lea o ia i lalo, ma fai atu ia Iesu ma le fiafia tele, ‘o le a ou vaeluaina atu a’u mea ma e matitiva, afai foi ua ou ave mea a se tasi i se ala pepelo ou te tau ai e taifa. O upu ia tatou te iloa ai tamaiti, ua talia fiafia Iesu e Sakaio i lona loto, ua ia alofa i ai, ua salamō ma ava ia Iesu, e ta’u mai ia i tatou, ua lē toe mafaufau lava Sakaio i ni tupe ma nisi mea, ae pau le mea ua ia fiafia i ai, o le talia loa o Iesu e fai mona Alii ma Faaola. O lea na mana’o ai loa Iesu e o ma Sakaio e talisua pe aai faatasi i le aiga o Sakaio. Pe ana le suia le olaga o Sakaio, pe ana le tia’ia foi e ia le oa sa fai ma ana mea fiafia ae alu ia Iesu, semanu e le maua e ia lenei faaolataga ua oo mai i lona aiga. Tamaiti e manaia se tagata e ola faapea e pei o Sakaio, po o le a le agasala sa fiafia i ai, ma mea na masani i ai, ae a lagona Iesu i lona loto, talia loa ma sui le olaga. Ia tatou alolofa ia Iesu ma talia o Ia, e ala i au mea e fai, usita’i ma faalogo i matua, faapea foi lou faifeau ma e matutua, toaga i le lotu, toaga i le a’oga ma alofa i so o se tasi, atoa ma mea lelei uma e fiafia ma ai Iesu ia i tatou.

GALUEGA FAATINO: TALIGA FESILI

1. O ai le nuu sa fetau ai Iesu ma Sakaio?

Tali: Ieriko

2. O le a le ao lafoga?

Tali: O le tagata lena e faamaopoopoina tupe a se faalapotopotoga

3. O le a le fetalaiga a Iesu na fai ia Sakaio a’o i luga o le laau?

Tali: Sakaio e, ia e vave ifoifo ia i lalo, aua e tatau ona ou nofo i lou fale i le aso nei.

4. E faapefea ona e iloa ua talia Iesu e Sakaio?

Tali: Aua na ia fai atu ia Iesu ou te vaeluaina atu a’u mea ma e matitiva, ou te tau ai foi ta’ifa pe afai ua ou aveseina ni mea a se tasi i se ala pepelo.

5. O le a le mea ua oo i le aiga o Sakaio i le aso nei?

Tali: O le Faaolataga mai le Alii

PESE: Sakaio, ua a'e i le laau
O Iesu ua valaau
Sakaio ia e alu ifo faavave
Ou te i ai i le asō i lou fale
La la lala
O Iesu o le Faaola.

(fati – Le masina ua vaaia i luga o mauga)

A'OA'OGA:

1. Talia Iesu i o tatou olaga.
2. Po o le a lo tatou leaga e saili mai pea Iesu ia'i tatou.
3. Salamo nei loa ma alofa ia Iesu.

TATALO:

Le Alii e faafetai mo le tala lelei ua o matou faalogo i ai, ia avanoa foi i matou ma ave la matou faamuamua i lou valaau mai i au feau ma au galuega, Amene.



**UA LAGONA E SAKAIO LE VALAAU MAI O IESU,
UA IA TALIA LELEI.**

ASO SA: 30 AOKUSO 2015

MATAUPU: O LE MEAALOFA A PETERU MA IOANE.

SINI: Ia a'oa'o le vasega ina ia malamalama i le uiga o le meaalofo a Peteru ma Ioane i le tagata ma'i.

TUSI FAITAU: Galuega 3: 1 – 6

FESOASOANI MO FAIAOGA:

Tamaiti e masani ona e fai meaalofo i se isi tagata? O a ni taimi e vaaia ai ni faigameaalofo? Ioe o taimi o aso fanau, o taimi o ni faigamalaga, ia po o le taimi foi o le Kerisimasi ma le Tausaga fou. O taimi ia tatou te vaaia ai ua fai meaalofo mai o tatou aiga ma uo, ia ma le tele lava o aso o lo tatou ola i isi mafuaaga e tele a ea?

A'o la tatou mataupu, o le meaalofo a Peteru ma Ioane. O Peteru ma Ioane o so'o ia o Iesu. O tagata ia na sili ona latalata ia Iesu i taimi a'o latou mafuta. Fai mai ua o a'e i la'ua i le malumalu i le itula e tatalo ai i le afiafi, ae omai o lo'o nofonofu atu le pipili i luma o le faapaologa, e igoa o le Matagofie. O le masani lea a lenei pipili i aso uma, e nofonofu i lea nofoaga ma aisi solo i tagata mo ni meaalofo. Ua vaai atu o ia ia Peteru ma Ioane, ona seese ane lea ma valaau atu ia i la'ua, pe mafai mai ni a la meaalofo mo ia. Fai mai ua lagona e so'o nei le alofofa i lenei tagata. O lea na tali atu ai loa Peteru, e le o iai se auro po o ni ario ia i ma'ua, a'o le mea ua ia te au e fia avatu ia te oe. O le suafa o Iesu Keriso, o le Nasareta, ou te fai atu ai inā tula'i ia ma savali. Ua le o se meaalofo masani foi lea ua tatou masani ai, ae o se meaalofo sili mai i le Alii, o le mana o le Alii e malolo ai lenei pipili ma i latou uma e fia maua le ola. Fai mai ua faatu e i laua le pipili i luga, ona malolosi ai lea o ona vae, ua tula'i ua savali, ua oso i luga ma vivii atu i le Alii, ma ulu atu ma i la'ua i le malumalu. Ua vaai i ai tagata o le nu'u, ua ofo i latou, ma latou iloa ai, o le mana lava o le Alii ua malolo ai o ia, e auala mai ia Peteru ma Ioane.

Tamaiti, e ese le manaia o le meaalofo a Peteru ma Ioane a ea, ua le o ni tupe, meai po o se isi lava mea, a'o le suafa o le Alii, po'o le mana o le Alii sa ia i la'ua, e mafaia ona faamalolo ai ma'i ma ofo atu e ola ai nisi tagata. Tatou faamoemoe lava i le mana o le Alii, e fesoasoani mai ia i tatou, tatou te mafaia ai mea faigata e feagai ma i tatou. Toaga e tatalo, fesoasoani i lau a'oga, i o'u ma'i ma ou tigā.

GALUEGA FAATINO: AVANOA FAATUMU

- *Fili le upu talafeagai e faatumu ai avanoa o i lalo.*

Matagofie, auro, Peteru, pipili, Ioane, malumalu, savali, Nasareta.

Ua o atu so'o o Iesu, e igoa ia _____ ma _____ ae aisi mai se _____ sa i luma o le faapologa o le _____ e igoa o le _____. Na tali atu i la'ua e leai se _____ po o se ario, ae pau le mea e fia avatu, o le suafa o Iesu Keriso le _____, e fai atu ai, ina _____ ia.

PESE: Peteru ma Ioane na malaga
Na tau atu i le pipili i le ala
Na alaga ma aisi mo sina mealelei
Ae tali atu Peteru faapenei
E leai se ma siliva po o se auro
A'o le mea ua ia te au ou te avatu
O le suafa o Iesu Keriso le Nasareta tulai ia ma savali

Tali: Savali ma oso ma vivii i le Atua x 2
I le suafa o Iesu Keriso le Nasareta tulai ia ma savali.

A'OA'OGA:

1. O le meaalofa sili mo le tagata o le mana o Iesu Keriso.
2. Alofa i tagata uma.
3. Faatuatua i le mana o le Atua, na te mafaia mea uma.



UA 'AISI SOLO LE PIPILI I TAGATA



PETER BRAVELY DOING HIS WORK

FAIMEAALOFA I LE MANA FAAOLA O IESU

MANATU TAIALA O SETEMA: FAI LE MEA UA FAASINO MAI E LE ATUA E FAI

O le aano o lo tatou ola, tatou te ola ia fai le finagalo o le Atua. Tatou te su'esu'e i le Tusi Paia, po o a mea ua faasino mai e le Atua mo i tatou, tatou te o e faatino ma faataunuu.

ASO SA: 6 SETEMA 2015

MATAUPU: UA LIUTOTO LE VAI.

SINI: Ia a'oa'o le vasega ia malamalama pe na faapefea ona liutoto vai o Aikupito.

TUSI FAITAU: Esoto 7: 19 – 25

FESOASOANI MO FAIAOGA:

Na faalogo muamua tatou tamaiti i le tala lea ua liu toto le vai? O le mala muamua lenei na tu'u e le Atua ia Aikupito, ina ua mumusu Aikupito e tu'u atu Isaraelu e o, o le vai ua liutoto. Fai mai ua fetalai mai le Alii ia Mose, ina fai atu ia ia Arona, ina tago ia i lou to'oto'o ma faaloaloa lou lima i luga o vai o Aikupito, i o latou vaitafe, i o latou vaita'i ma o latou vailepa, ma mea uma lava o i ai o latou vai, ina ia liu toto, ia i ai toto i le nuu i ipu laau ma ipu maa. Fai mai ua faia e Mose ma Arona le mea ua faasino mai e le Atua e fai. Ua sii e Arona le to'oto'o ma na taia ai le vai o le vaitafe i luma o Farao ma ana auauna, ona liu toto ai lea o le vai uma lava o le vaitafe. Tou te iloa la le mea na tupu, ua mamate uma ia sa i le vaitafe, ua elo foi le vaitafe, ma ua lē mafai e Aikupito ona inu le vai o le vaitafe ina ua iai le toto i ona itu uma. Ua taumafai taulaitu o Aikupito e fai se faiga ia lelei ai le vai, a ua lē mafai, ua o latou saili i vaitafe pe maua ai ni vai lelei. O se mea ofoofogia lenei mea ia Farao ma le nuu uma, ae lē liliu ai lava le loto maa ma le faamaualuga o le tupu. Ua fa'aatoa foi e le Atua o aso e fitu, talu ona liu toto le vai. Tamaiti ua tatou malamalama la i le silisili ese o le Atua. Sa faalologo lava Mose ma Arona i le mea e faasino mai e le Atua e fai o le mea lena e fai. Sa o la faia ma le talitonu, e ui e le faigofie ona faaliliu e se isi le vai ia liu toto, ae o i e iloa ai e tagata uma, le silisili ese o le Atua, e le faatusaina i ai se tagata. E faapena foi tatou, tatou faamoemoe ma faalologo po o le a e faasino mai e le Agaga o le Atua tatou te o e fai, tatalo ma augani iai i mea uma tatou te manana'o ai, o le mea mautu ma atoatoa lena, tatou te ola manuia ai, i le faatasi mai o le Atua.

UPU FAAMALAMALAMA

- | | | |
|----------------|---|----------------------------------------------------------|
| i) vaita'i | - | o alavai |
| ii) vailepa | - | o vai e to'a e le tafe |
| iii) ipu laau | - | o ipu faaofuofu e vaimama ai le vai e fai i laau |
| iv) ipu maa | - | o ipu maa faaofuofu e teu ai le vai mama mo se taimi umi |
| v) faamaa'aina | - | faamalo atili, faamaualuga pea le loto. |

GALUEGA FAATINO: FAATALANOAGA

- Faatalanoa le vasega i aafiaga o ituaiga vai nei e lua; o *vai lelei* ma *vai ua liu toto*.

O vai lelei Vai ua liu toto

FESOASOANI

- | | |
|------------------|----------------------------------|
| - e inu ai | - ua elo |
| - fai ai meaai | - le mafai na inu |
| - taele ai | - ua lē lelei mo ni meaai |
| - ta ai lavalava | - ua lē mafai ona fai ni tagamea |
| - utu ai taavale | - ua lē aoga mo taavale |
| - manava ai i'a | - ua mamate ai i'a |

PESE: Faalogo ma usitai e leai se isi ala

A'OA'OGA

1. Usitai i faatonuga mai le Atua e lelei ai.
2. Talitonu e mafaia e le Atua mea uma.
3. Aua le ola fia tofotofo i le Atua.

TATALO:

Faafetai tele le Atua i lou agalelei faifaipea mo i matou uma, ae ia e alofa ma faatupu pea le augofie i ai matou, matou te faia ai so o se mea lelei e faatonuina ai i matou mo lau Afio, Amene.



UA FAALOLOGO MOSE MA ARONA I LE ATUA

ASO SA: 13 SETEMA 2015

MATAUPU: UA ITA IESU I E FAATAU 'OA I LE MALUMALU.

SINI: Ia a'oa'o le vasega ia malamalama i le mafua'aga o le ita o Iesu ma le mea na tupu ai.

TUSI FAITAU: Ioane 2: 13 – 16

FESOASOANI MO FAIAOGA:


E masani ona e faalogo i se tala faapea, ua ita Iesu i se isi? E leai a? O Iesu lava ia e alofa, e tausafia, e leiloa e ia ona ita i se tasi pe lē fiafia foi i se tagata. A'o lea ua fai mai la tatou mataupu, ua ita Iesu, i ē faatau'oa i le malumalu. O lona uiga o le ava o Iesu i le fale o lona Tamā po o le malumalu, lea ua fai ma fale faatau ai oloa, o le mafuaaga la lea ua ita ai o Ia, i nei tagata leaga.

Fai mai le tala a Ioane, ua lata mai le aso o le paseka, o le aso e fai ai le 'aiga faamanatu a Isaraelu e fiafia ai tagata uma, ona maliu ane lea o Iesu i Ierusalem. E ulu atu o Ia i le malumalu tapua'i o lo o faatau mai ai povi, o mamoe, o lupe ma isi oloa e tele, ma fai mai ai suiga o tupe i totonu o le malumalu. Ua lagona e Iesu le ita tele, o lea na ia faia ai le sasa i le maea tua iti, ma ia tutuli ai ia i latou faatasi ma manu i fafo, ua na fuli i lalo o laulau ma faasalalau solo tupe. Ua ia faapea atu i nei tagata, "Ave ese ia nei mea, 'aua le faia le fale o lo'u Tamā ma fale faatau oa." O ia upu tatou te iloa ai, ua ita tele Iesu, a'o lea ita, e iloa ai lona ava i le fale o lona Tamā, aua ua faaeleelea e su'e ai le 'oa faalelalolagi, a'o le maota e fai ai tapuaiga i le Atua, o le 'oa faalelagi mō ona tagata. Ia tamaiti, e le te'ite'i ita Iesu, e mafua ona ita Iesu, ona e ava ma faapelepele i le malumalu o lona Tamā. O le fale e fai ai lotu, e tatalo ma vivii ai, ae lē fa'aaogaina e su'e ai tupe ma oloa faalelalolagi nei. E mana'o Iesu e o tagata i le malumalu e fai ai lotu i le Alii, ma mafuta atu ai i le Atua. O lona uiga e ita foi Iesu ia i tatou tamaiti, pe a ta'aalo i totonu o le falesa pe aai ai pe faia ai nisi tulaga. Ae mana'o o Ia, ina ia o tatou ava i le malumalu ma faapelepele, leaga o le fale ua ta'u ai lona suafa e faavavau. Tatou usita'i la'ia i le mea ua mana'o mai ai Iesu mo i tatou, e uiga i lona maota.

UPU FAAMALAMALAMA:

1. paseka - aiga fiafia faaleaiga o Isaraelu
2. malumalu - sunako, falesa, maota tapuai.

GALUEGA FAATINO: AVANOA FAATUMU




Fa'aaoga upu o i le lisi e faatumu ai le ata

- faatau povi
- tatalo
- vi'iga
- taaalo
- faatau lupe
- lauga
- faatau mamoe
- suiga o tupe
- faatoese

PESE: Sau ta o ma au i le maota. x 3

A'OA'OGA:

1. Ia ava i le malumalu tapua'i o le Atua.
2. Fiafia e alu i le malumalu e tatalo ae le o le taalo.
3. Usita'i iā Iesu i so o se mea e finagalo ai.



UA ITA LAVA IESU I E FAATAU 'OA I LE MALUMALU



UA FULI LAULAU MA TULI I FAFO TAGATA

ASO SA: 20 SETEMA 2015

MATAUPU: UA USITA'I KITIONA I LE ATUA.

SINI: Ia a'oa'o le vasega ia iloa le usita'i o Kitiona i le Atua.

TUSI FAITAU: Faamasino 7: 2 – 7

FESOASOANI MO FAIAOGA:

Tamaiti, ou te iloa pe sa faalogo muamua tatou i le tagata lenei e igoa ia Kitiona pe leai foi. A'o Kitiona sa tofofi e le Atua e fai ma ta'ita'i'au o Isaraelu, ia po o ia foi o se faamasino i le nu'u o le Atua, o le isi ona igoa o Ierupa'ala. Fai mai ua ta'ita'i mai e le Atua Kitiona ma ana 'au e faalatalata i le fanua, o lo o to lauapi po'o faamautu ai le nuu po o le vaega'au lenei a Mitiana. O Mitiana o se tasi o itu taua tele ma le malosi o se fili foi o Isaraelu.

Ona fetalai mai lea o le Alii ia Kitiona, ua toatele naua le nuu o ia te ia, e manaia ae fili mai nisi toaitiiti e tau ma Mitiana ne'i mitamita Isaraelu pe a malo i latou ma faapea o lo latou malosi ua malo ai. Ua finagalo le Atua e fai i le nu'u, o ai lava o gatete ma palaa'i, inā toe foi ia i lona aiga. Ona toe foi atu lea o le 22,000 o fitafita, ae totoe mai fitafita e 10,000. Ua toe finagalo le Atua, e toe aveese nisi auā o lo o toatele pea. Ua ia fetalai atu ia Kitiona e ave i latou i le vai e faafeinu ai, o ai lava e matuā to'otuli ma inu etoeto i le vai, e toe foi i lona aiga. A o ē e asu ane le vai i o latou lima ma tutu lelei i luga ma inu e iloa atu ai le fili, o tagata sa'o na e filifilia, o iinā na totoe mai ai le 300 o fitafita, o e na asu ane le vai ma inu ai. O tagata po o fitafita na sa latou tulia Mitiana ma faatoilaloina i latou ai luma o le Atua. O se mea ofoofogia ia Isaraelu le toaitiiti ae manumalo, ina ua 'au faatasi ma le Atua. E mafua nei mea uma, o le usiusita'i o Kitiona i faatonuga uma ma mea uma na faatonu mai e le Atua e fai. Auā pe ana lē faalogo ma usita'i Kitiona i le Atua aemaise ua na talitonu i le aao lavea'i ma le mana o le Atua o Isaraelu, e lē mafai lava ona latou manumalo ia Mitiana, auā o le nu'u toatele ma le malolosi.

Tamaiti, ua a'oa'o mai lenei tala mo i tatou, i le taua o le ola faalogo ma usitai, tu'u loa i ai ma le talitonu i le mana silisili ese o le Atua e na te mafaia ai mea uma. Usita'i i lou faiaoga, o lau faifeau, o e matutua, o ou matua, ae faasilisili ai lou usita'i ia Iesu lo tatou Alii Faola.

GALUEGA FAATINO: GALUEGA TULITULILOA

E 2 faatonuga na fai e le Atua ia Kitiona.

- i). Alaga atu i le nuu (Isaraelu) ai se mata'u ua gatete, ina toe foi ia i lona aiga.
 - ii). Ave le nuu e faafeinu i le vai, o e inu etoeto ma to'otutuli e toe foi, a o e e asu ane le vai i o latou lima, o i latou na e filifili mo le taua.
- Ia tofi tamaiti e tauloto pe faamatala mai faatonuga e lua o i le mataupu (auauai uma tamaiti o le vasega)

PESE: Faalogo ma Usita'i

A'OA'OGA:

1. E taua tele le usiusita'i i le Atua.
2. Talitonu ma faamoemoe i le Atua 'aua le masalosalo.
3. Faalogo toto'a i faatonuga e faatonuina ai i tatou.



UA FILI LE AUTAU A KITONA MAI LE VAI, E PEI ONA FINAGALO AI LE ATUA.

ASO SA: 27 SETEMA 2015

MATAUPU: O LE TOETU MAI O LASALO.

SINI: Ia a'oa'o le vasega ina ia malamalama, sa toe faatuina e Iesu Lasalo mai le tu'ugamau.

TUSI FAITAU: Ioane 11: 39 – 44

FESOASOANI MO FAIAOGA:

Tamaiti, o ai foi na maliu ma toetu mai i le aso tolu? Ioe o Iesu lo tatou Faaola, ua na o Ia e toatasi na mafai ona toetu mai nai e ua oti. O Ia foi lea na mafai ai ona toetu mai le tagata lenei e igoa ia Lasalo. Auā o le mana o le Atua, o Iesu lava lea, e mafai ai mea faigata uma o lenei ola. Fai mai ua oo atu Iesu i le tuugamau, ua fetalai atu, “Ave ese ia le ma'a.” Ae tali mai le tuafafine o le ua maliu e igoa ia Mareta. “Le Alii e, ua o'o ina manogi, auā o lona po fa lenei.” E pei e le talitonu i le mea ua fai mai ai Iesu. Ona toe faapea atu lea o Iesu, “Afai e te talitonu, ona e iloa lea o le mamalu o le Atua. Ona latou aveese lea o le ma'a, mai le gutu o le tuugamau. Ua tepa a'e fofoga o Iesu ua faapea atu, “Lo'u Tamā e, ou te faafetai atu ia te oe, auā ua e faafofoga mai ia te au.” Ua faia e Iesu nei upu uma, ua ia augani atu i lona Tamā, auā o lo o molimau le tele o tagata, ia iloa ai, o le Atua lava Ia.

Ua alaga Iesu, “Lasalo e, ina sau ia i fafo.” Ua faateia uma i latou, o e na masalosalo ma lē talitonu. Ona savali mai lea o Lasalo i fafo ma le tuugamau, ua fusifusia ona vae ma ona lima i fusi, ua fusi foi ona mata i le solosolo. Ona fetalai atu lea o Iesu ia te i latou, “Tatala ia iā te ia, inā tu'u atu ia e alu.”

O mea e lē mafaia e le tagata, ae faigofie i le mana ole Atua. O a mea ua faatonuina mai e Iesu e fai, usitai i ai ma le faatuatua, auā e mafaia lava. Tamaiti, e aoga tele mo i tatou lenei tala, pe tatou te le vaai atu ia Iesu pe a, a o lona Agaga o lo o mafuta mai mo i tatou i taimi uma. Ia o tatou faalagolago i ai, talitonu i ai i taimi tatou te moomia ai o Ia. O ā mafatiaga ma mea fagiata e oo mai, ua na 'o Iesu lava tatou te malolō ai. Manuia tele outou le fanau.

UPU FAAMALAMALAMA:

1. vagavagai - auai, molimau.

GALUEGA FAATINO: FAATINOGA PUUPUU

1. E tolu (3) tagata taua: (i) Mareta (ii) Lasalo, (iii) Iesu.
2. E manaia ae faailoa vaega a i latou o i luga e faatino e pei ona i ai le tala sa faamatalaina.
3. Tofi loa ni sui se to'atolu, latou te faatinoina mo se tolu minute si vaiga lea.

PESE: O lima o Iesu o lima agalelei e alofa i tagata uma
E faamalolo i tagata mamai ma faamanuia i tamaiti
O nai o'u lima e auauna ai e tali ai le valaau
O lima o Iesu o lima agalelei e alofa i tagata uma.

A'OA'OGA:

1. E leai se mea faigata i le Alii.
2. Faamoemoe ia Iesu e malōlō ai.
3. 'Aua le alu masalosalo i le Alii.

TATALO:

Alofa le Alii e ma faamatalaloto i ai matou le mana o au galuega uma, ina ia o matou talitonu pea e ao ona o matou sulu atu ma le faatuatua i ou aao matou te ola ai, Amene.



O LASALO LENA UA TOETU MAI LE OTI



**UA VALAAU MAI IESU IA LASALO E ULUFAFO
MA LE TUUGAMAU**

MANATU TAIALA O OKETOPA: IA TOE AMATA I MEA LELEI.

O le suiga o ola talu le tele o mea iila ma faatosina ua felanulanua'i i so o se tafa o le lalolagi, e ao ona faia i ai se suiga lelei, aemaise lava i le ola o nai fanau. Pau lava le suiga faigofie, e ao ona toe amata le ola o le tama ma le teine, i le Tusi Paia, o le mea lelei lea.

ASO SA: 4 OKETOPA 2015.

TAULOTO: O TOA O LE TALA LELEI I LE FEAGAIGA TUAI MA LE FEAGAIGA FOU.

Pese: (fati : O Iesu le uo a tamaiti)

*O matou nei o toa ta'uta'ua
O toa ta'uta'ua, a le Atua
Faata'ita'i ai lou soifua
E viia ai le Atua. (x2)*

FEAGAIGA TUAI:

FAAMASINO: “Ou te valaau atu i lo outou paia ma lo outou mamalu. O outou o toa o le Tusi Paia, ina ia faalatalata mai i luma nei, se'i saili po o ai tonu le toa.

(Haka: “O AI LE TOA, O AI LE TOA, E LE ILOA” X3) (fai faatasi tamaiti)

1. Talofa lava! O a mai outou? Ia o a'u lenei o le ulua'i tagata na faia e le Atua i le amataga. O Atamu le igoa. O le alii o aiga, auā o a'u o le ulumatua.
2. O a'u lenei o Noa. E leai lava se isi ma te tutusa. Sa ou fauina se vaa laupapa tele ma malosi, ma faasaoina ai a'u ma lo'u aiga, aemaise o meaola uma. Ana leai a'u, semanu e leai foi se outou. (*pese: O ai na fau le vaa.....*)
3. E ui lava i tagata uma, ae leai lava se tasi na faamanuia i ai le Atua, faapei o a'u. O a'u foi lenei ua faa-Tama i ai le au faatuatua uma lava. E le o so'u mimita la, ae lelei ona faata'ita'i faapei o a'u. Ae a fia fesili i le igoa, o Aperaamo. (*valaau se tamaititi- "Samoa! O ai le Tama o le au faatuatua? (tali uma tamiti: O Apearaamo!, o Aperaamo! Hi!)*)
4. O Iosefa lenei e tautala. Ou te iloa le alofa o le Atua i lo'u olaga, ma vavega na Ia faia mo a'u. Ou te le faitioina o'u uso ma mea leaga na o latou faia ia te a'u. Ua ou toe nofo nei ma ou mafaufau, o auala na saunia e le Atua, aua lava nai o'u matua ma lo'u aiga i le lumana'i.
5. O Raava lenei. E toatele lava i latou fai mai ou te leaga. Ae ana leai a'u, e le taunuu le faamoemoe o lo'u nuu o Isaraelu mo Ieriko. Ina ne'i tou faapea ua ou pepelo ma ua ou agaleaga i le nuu o Ieriko. Ua fetau lelei le mea ua faia, leaga ua amio leaga foi tagata Ieriko latou.
6. Hahaha..Talofa lava. O a'u na valaauina e le Atua, ina ia aveeseina mai lona nuu mai Aikupito, tiga lava le ita o Farao. E to'atele a tagata toa sa i ai i lo matou vaitaimi, peita'i, ua na o a'u na tusi aao i ai le Atua, mo lea faamoemoe lelei. O ai la a'u? (*tali uma tamaiti _____ "O MOSE" pese: O Mose na ta'ita'i*)
7. O Tepora lenei. O a'u lava le ulua'i faamasino tamaita'i o le talafaasolopito, ma o le taimi na leai ai se tupu o Isaraelu, pei sa fai a'u ma o latou faaolataga, ia po o le ta'ita'i foi.
8. E fiu e saili i le lalolagi se tagata aupito sili ona malosi, e pei o le tagata lea e tautala atu. O Samasoni le igoa. O le toa mai Samoa. (fa'aali maso, O ai e malosi? “O SAMASONI! O SAMASONI! O ISARAELU.

9. Alii Samasoni! Ma'imau lou malosi pe ana le faasesēina oe e lena fafine auleaga. O Ruta lea. E ui ona o a'u o le teine Moapi, ae na le faapito lava lo'u alofa, i le olomatua o Naomi le tina o la'u tane. Sa ou mulimuli lava ia te ia ma ou tausī faamaoni ia te ia.
10. A fesili se tasi i lo'u igoa, ona mate mai lea. "O a'u o le tupu lona lua o Isaraelu. O le uii o le fanau a lo'u tama ma lo'u tinā. Ou te lē malosi, ae toa lo'u loto. Ou te aulelei, ae ou te lē faatupu masei. O lo'u gafa, na tau lava i le Mesia.

(AHHH.....DAVID.....(Usu le pese mo Tavita)

(a to'atele le vasega, o lo o tele lava nisi toa o le Feagaiga Tuai)

TOA O LE FEAGAIGA FOU

HALOHA! My name is Mathew po o Mataio. O a'u lava le ulua'i tusi o le Feagaiga Fou. E i ai le mafua'aga ua ala ai ona ou muamua i le lisi.

1. O Ioane leni. O le papatiso i le vaiatafē o Ioritana. O la'u galuega, o le teuteu ala, e ala lea i le faamamāina po o le papatisoina lea o tagata salamō, e faatalitali ai le Alii o lo o mulimuli mai. O a'u lava le toa..
2. O Lasalo leni. Le tagata ma'i papala. E leai lava se isi na oti ae toe ola mai faapei o a'u. O a'u foi le tagata na tagi ai le Alii o Iesu, i lona alofa ia te a'u.
3. Talofa lava! O Maria lo'u igoa. O le tinā Paia. O le ala lena na filifili ai a'u e le Atua, e ala mai ai le Faaola. (pese: Vivii lo'u loto i le Alii,.....)
4. O Simeona lea. O le ositaulaga faamaoni.
5. E leai lava se tagata e toa pei o a'u. Sa ou leaga muamua. Ae na liliuina a'u e le Alii e fai ma ana ave feau i nuu ese. O ai la a'u?
(valaau tamaiti uma: O PAULO)
6. E sa'o lelei si toeaina lea faatoa uma atu. Ae pei a la o a'u le faamoemoega o Iesu i le taimi o lana galuega. Vaai outou, o Peter lea e tautala. O le so'o matua ma faamoemoeina o le Alii.

(fa'aauau e lau Susuga i le faiaoga nisi tagata taua o le Feagaiga Fou, pe a to'atele tamaiti)

Faai'u ia Iesu: "O a'u lava o le ala, upu moni ma le ola. E le alu atu lava se tasi i le Tamā, pe a le ui mai ia te a'u"

(Valaau tamaiti uma ma ifo: "Iesu, o oe lava o le Toa o i matou uma.)

(Valaau le to'atasi: "O AI LE TOA?" tali: "O AI LE TOA, O AI LE TOA, IESU x2")

Pese Faitaga. O IESU O LE TOA TO'ATASI. (fati: O Iesu le uo a tamaiti)

.....

ASO SA: 25 OKETOPA 2015.

MATAUPU: E LEAI SE POPOLE INA UA AUAI FAATASI MA IESU.

SINI: Ia a’oa’o le vasega ina ia malamalama, e anapogi le tagata pe a le i ai Iesu, ae a i ai Iesu, e leai la se mea e popole ai.

TUSI FAITAU: Mareko 2:18-20.

FESOASOANI MO FAIAOGA:

“E i ai se tama po o se teine e iloa lea mea o le anapogi? Lelei. O ai se tasi e masani ona ia vaai i lona tamā ma lona tinā o fai ni a la’ua anapogi? Lelei. Ae aisea foi e mafua ai ona anapogi le tagata? Manaia. Ia faalogo lelei a, a’o lea o le a ou faamatalaina le anapogi.

O le anapogi, o le faagaogaoina lea o le tagata, po o le faapologaina lea o le tino o le tagata mo sina taimi, e tuuina atu mo le Alii, e fesoasoani mai i se faafitauli o lo o feagai ma ia. O le faagaogaoina tamaiti, o le le ai ma inu i nai itula. Faata’ita’iga, e masani lava le toatele o tagata, a ta loa le 12 i le po, ona amata lea o le anapogi. E lē toe ai, pe inu mai lava i le taimi lena, se ia oo i le 12 i le aoauli, ona fai lea o le tatalo e tatala ai le ai ma le inu, ma ta’u atu i le Atua mea o lo o ia mana’o i ai, ia po o se faafitauli o lo o feagai ma ia.

O le tala mo i tatou i lenei Aso Sa, fai mai, sa anapopogi le au so’o o Ioane ma le au so’o o le au Faresaio, a’o le au so’o o Iesu, e le’i anapopogi i latou. O le mea ua tupu tamaiti, ua fesiligia, po ua lē fialia le au Faresaio, ona o le lē anapopogi o le au so’o o Iesu. O le ala lea ua fesiligia ai Iesu, pe ua feita ia Iesu, ona o le lē anapopogi o so’o o Iesu. O le tali a Iesu, “Pe mafai ea aumea a le faato’afaiava ona anapopogi ina o ia te i latou le faato’afaiava?”. O le faato’afaiava tamaiti, o le upu lea e faamatalaina ai se tama faatoa fai lana ava, pe faatoa fai sona to’alua.

O lo o fetalai Iesu, o Ia o le faatoafaiava. Tamaiti, e lei faia se to’alua poo se ava a Iesu. Peita’i, o lo o faaigoaina e Iesu lona au so’o, o lana aumea mamae. Tamaiti, o le aumea mamae, faatoa faalogo ai tatou i le taimi o faaipoipoga. O le ta’uga lea e le faatoafaiava, po o le tama o le a faaipoipo, o ana uo po o lana laina, o le aumea mamae.

Ioe tamaiti. Sa le’i popole le au so’o po o aumea mamae, ia po o uo foi a Iesu i le faia o le anapogi, leaga o lo o latou mafuta faatasi ma lo latou Alii o Iesu. O le a le mea o le a anapopogi ai fua latou i o latou faafitauli, po o ni manaoga faapitoa, o lea o lo o latou mafuta ma lo latou Alii o Iesu, o Ia e fesoasoani, ma faaola ia te’i latou?

Tamaiti, o le tatou tala lena. E leai lava se mea e popole vale ai so o se tagata, ina ua i ai faatasi ma Iesu. Ae faafefea la le taimi nei ia te’i tatou? Ioe! Tatou te le o vaai atu ia Iesu. Ua na o lona Agaga Paia, o lo o mafutaina i tatou i Aso uma. O lona uiga, e ui ina le vaia Iesu, ae tatau ona tatou faatuatua o lo o i ai pea o Ia ma i tatou.

GALUEGA FAATINO: Tali i le “SA’O” po o le “SESĒ”.

1. Sa anapopogi le au so’o o Ioane ma le au so’o o le au Faresaio. (sa’o)
2. Sa anapopogi foi le au so’o o Iesu. (sesē)
3. Ua fialia le au Faresaio i le mea ua faia e le au so’o o Iesu. (sesē)
4. “Pe mafai ea aumea a le faatoafaiava ona anapopogi, ina ua ia te’i latou le faatoafaiava?” o fetalai lea a Ioane. (sesē)
5. E le’i popole le au so’o o Iesu, auā o lo o latou mafuta ma Ia. (sa’o)

PESE: E leai se mea e faigata (Nothing is impossible)

A’OA’OGA:

1. Aua tatou te popole, aua ua ia te i tatou le Alii.
2. Anapogi ma le faamaoni, i mea ua tatou mafatia ai.

TATALO:

Faafetai Iesu i lou mafutaina o i matou le fanau. E leai lava se matou te popole ai, auā ua fai Oe ma o matou Faaola, matou te malu ai i mea faigata o le ola. Tumau lou Agaga i luga o i matou uma, ma fanau i le lalolagi atoa, Amene.

.....

MANATU TAIALA O NOVEMA: IA FIAFIA I SOO SE TAGATA.

E le faailoga tagata le alofa o le Alii. O lona foi lea finagalo, ina ia o tatou fiafia e mafuta i so o se tagata, ma alofa i ai.

ASO SA: 1 NOVEMA 2015.

MATAUPU: O LE AOGA SA FAIA E IESU I LE MAUGA.

SINI: Ia a'oa'oina le vasega ina ia iloa ma malamalama lelei, i le taua o le aoga sa faia e Iesu i le motu o tagata.

TUSI FAITAU: Mataio 5:3-11.

FESOASOANI MO FAIAOGA:

Talofa tamaiti! O ai e fiafia e alu i le aoga? Lelei tele. A'o ai la e fia mana'o e avea ma faiaoga? Lelei! *O le a le galuega a le faiaoga e fai, ae o le a la le mea e tatau ona fai e le tamaiti ma le teineititi aoga?* O le galuega a le faiaoga, o le a'oa'o atu, ma ta'u atu i tamaiti le tomai ma le iloa i mataupu eseese, e aofia ai le siosiomaga atoa o le tagata. O mea ia e ao i le tama ma le teine aoga ona ia taofimauina, e maua ai lona lumana'i manuia, i se galuega o le a ia maua. Faalogo lelei mai la outou, i le galuega a le faiaoga, ma lana aoga sa faia.

O Iesu, o le faiaoga silisili. O le faamoemoe foi lea sa ia te Ia, ma le aoga sa Ia faia i luga o le mauga, e pei ona i ai le mataupu o lenei Aso Sa. O le finagalo o le Alii, ina ia ta'u atu i tagata faamanuiaga e maua e le tagata o lo o i ai meaalofa eseese e pei ona Ia a'oa'o atu. O le loloto o a'oa'oga a Iesu e ala i lana aoga, e faamoemoe i le loto o le tagata e mafuta ma mau i le Alii, ona maua lea o faamanuiaga e tele e pei ona ia faamatalaina, i le malo o le Atua e faavavau. O le aoga lava ma le faamoemoe, o le maua lea e tagata uma o ia faamanuiaga, ina ua faalogo ma talitonu, ma ola ai le tagata Kerisiano i aso uma.

O lo o faaigoaina le aoga lea na faia e Iesu, o le lauga faa-amuia. Amuia le tagata e faia le finagalo o le Atua. Amuia le tagata o loo i ai manaoga o le fia maua o le Atua. Amuia le tagata e amio faa-Iesu. E mafai ona toe faamatalaina le aoga sa faia e Iesu i se faaupuga faapea, "E manuia so o se tagata e usita'i ma faalogo lelei i le Alii, ma ola ai i aso uma o lona ola".

GALUEGA FAATINO. FAATUMU AVANOA O LO O I LALO.

1. Amuia e matitiva i le agaga
2. Amuia e faanoanoa,
3. Amuia e alolofa atu

(fa'auau e lau susuga i le faiaoga)

PESE: Faalogo ma usita'i.

A'OA'OGA:

1. O Iesu, o Ia o le faiaoga o mea lelei uma.
2. Faalogo ma fa'aaoga a'oa'oga ua a'oa'o mai e Iesu mo i tatou.

TATALO:

Faafetai Iesu mo a'oa'oga lelei ma le taua ua e a'oa'o mai mo i matou. O lau lava Afio le Alii e, o le faiaoga silisili. A'oa'o mai pea mo i matou au afioga paia, Amene.

.....



**UA A'OA'O ATU IESU I LE MOTU O TAGATA I LUGA
O LE MAUGA.**

ASO SA: 8 NOVEMA 2015

MATAUPU: UA ALOFAGIA IOPU E ANA UO.

SINI: Ia a'oa'o tamaiti ina ia malamalama, e alofagia i latou e a latou uo, pe a feagai ma ma'i ma faigata o le ola, faapei o Iopu.

TUSI FAITAU: Iopu 2:11-13.

FESOASOANI MO FAIAOGA:

O le toeaina o Iopu, o le tagata amiotonu o ia. Sa faamanuiaina foi o ia i tamaoaiga e tele, auā sa tele lana lafu manu ma ana faatoaga faatasi ma auauna sa ia te ia. O le tulaga lea sa i ai tagata mauoa i lea vaitau, e fua i le tele o lafu manu, o faatoaga ma auauna.

Peita'i, sa i ai le faafitauli na tupu ai ia te ia ma lona aiga. O mafatiaga pito sili lava ona tiga sa oo i le toeaina lea o Iopu. Ua aveesea uma lona aiga e ala i lona to'alua ma lana fanau. Ua leai foi se faatoaga o lafu manu ma mea uma o totoe. Ua faaleagaina ma faataapeapeina uma, e oo foi i ana auauna. E le gata i lea, a o lea foi ua feagai le toeaina o Iopu ma le ma'i papala. Ua atili ai le mamafa o le avega ua feagai nei ma Iopu.

O le tala lea i faigata ua feagai nei ma Iopu, na logo tala ai ana uo o Elifasa le Timanu, o Pilitati le Sua, ma Sofara le Naama. Ua tupu le alofa o nei uo a Iopu ma le mea ua tupu ia te ia. O le ala lea na o latou loto faatasi ai ina ia tuua o latou aiga ma o latou nuu, ae se'i o e faatino lo latou alolofa i la latou uo o Iopu, e ala i upu faamafanafana, ma le faaloto tele i lona mafaufau, i le mamafa o tigā o lona ma'i ma le mala ua tupu i lona aiga.

Ina ua taunuu nei uo alolofa, sa o latou vaايا le tulaga faigata ua i ai la latou uo o Iopu. Ua papala uma lona tino, ma ua faanoanoa ona foliga. Sa le'i toe faatali nei uo, ae ua faatino loa lo latou alolofa, ma ua faamafanafana ma faaloto tele, aemaise o lo latou tigā faatasi ma le toeaina o Iopu i lona ma'i.

GALUEGA FAATINO: FAATINOGA (PUT INTO ACTION)

E lelei le faatino e tamaiti o le tala. A to'atele le vasega, ona vavae lea ae tofu le vaega ma le faatinoga.

A mae'a, ona fai lea o ni fesili i le vasega po o ua malamalama uma.

PESE: Alofa i ou tuaoi

A'OA'OGA:

1. Alofa i tagata mama'i.
2. E faamalolo e Iesu o tatou ma'i.

TATALO

Faafetai le Atua i lou alofa mai mo i matou. Ua e a'oa'o mai i matou ina ia o matou alolofa i so o se tagata, e pei ona e alofa mai ia i matou. Ia faatumauina lou alofa ia i matou, ma i latou uma ua fia maua lau fesoasoani, Amene.



UA ALOFAGIA IOPU E ANA UO

ASO SA: 15 NOVEMA 2015

MATAUPU: UA ALOFA LAPANA IA IAKOPO.

SINI: Ia a’oa’o le vasega ina ia malamalama, e alofagia i tatou e o tatou lava aiga moni pe a o tatou sulufa’i i ai mo se fesoasoani, ina ua ia te i tatou le Atua.

TUSI FAITAU: Kenese 29: 9 - 14.

FESOASOANI MO FAIAOGA:

O Iakopo o le atalii o Isaako ma Repeka. Sa faasola o ia e lona tinā o Repeka, e alu e saili lona tuagane o Lapana e nofo ai, i le taimi o le matamataita o lona uso matua o Esau e fia fasioti ia te ia, talu le mea na ia faia, lea na ia faoa ai manuia o Esau mai lo la tamā o Isaako. O le ala lea o le oo o Iakopo ia Lapana le tuagane o lona tinā, auā o lo o saili lona uso matua o Esau, e fia faaoo le oti ia te ia. O le sola ese mai o Iakopo, sa lei avea ma mea e alo ai fofoga o le Atua ia te ia. Lea lava ua taunuu ia Lapana, ma ua alofagia o ia e le tuagane o lona tinā, talu le alofa ma aao agalelei o le Atua sa ia te ia.

O lea ua feiloa’i ma Lapana, ma ua faatino le agalelei ma le alofa o Lapana ia Iakopo, e ala i le ave i le fale ma fafaga, ma nonofo ma i latou. O mea e faia e le tagata peita’i, a aunoa ma le i ai faatasi o le Agaga o le Alii, e noa lava ma manuia.

E taua foi le galuega alofa na faia e Iakopo i le fanau a le tuagane o lona tinā, e ala i le faainuina o le lafu manu. O le isi foi lea auala ua atili ai ona alofa Lapana ia Iakopo le tama a lona tuafafine o Repeka, ona o Iakopo foi o le tagata alofa, loto fesoasoani ma agalelei.

GALUEGA FAATINO: TUSIGA ATA

- i) Tusi mai le ata o le tala sa faamatalaina, i le feiloaiga a Iakopo ma Lapana. A mae’a, ona auaua’i lea o tamaiti i luga, e faamatala mai le tala o lo o faa-ata mai i ata sa tusiaina.
- ii) Faamanino le faiā a Iakopo ma Lapana.
(Iakopo, o le tama a le tuafafine o Lapana. [nephew o Lapana])
(Lapana, o le tuagane o le tinā o Iakopo. [uncle o Iakopo])

PESE: “Alofa o se mea e te faasoa atu”.

A’OA’OGA:

1. E tatau ona o tatou alolofa i nai o tatou aiga.
2. Alofa i so o se tagata, ma le Atua.

TATALO

Le Atua, e lo matou Tamā. Faafetai tele i lou a’oa’o mai ia i matou, ina ia o matou alolofa i nai o matou aiga, o uo, ma so o se tagata. Galue mai pea lou Agaga, ina ia o matou lagona lou alofa mai pea mo i matou i Aso uma, Amene.

.....



UA ALOFA LAPANA IĀ IAKOPO.

ASO SA: 22 NOVEMA 2015

MATAUPU: IA TALA'I ATU LE TALA LELEI E MANUIA AI TAGATA UMA.

SINI: Ia a'oa'oina le vasega ina ia malamalama i le taua o le Tala Lelei o le Faaolataga, na faia e Keriso.

TUSI FAITAU: Mataio 28: 16 – 20 (mo le Faiaoga)
Mataio 28: 19 – 20 (mo le Vasega)

FESOASOANI MO FAIAOGA:

“Tamaiti! O ai se tasi e na te iloa lea mea o le Tala Lelei? Lelei! O le Tala Lelei, o le tala ia ai? Sa’o lelei outou. O le Tala Lelei, o le tala ia Iesu Keriso, le Alii Faaola, o le na faia le faaolataga mo le lalolagi atoa. Ia faalogo lelei i le tatou tala.”

O le mataupu o le nei Aso Sa, o lo o faamamafa lava le finagalo o le Alii o Iesu Keriso i lona au so’o, ina ia o atu e faasalalau atu le Tala Lelei i tagata uma, e uiga i le toe tu mai o Keriso mai le tuugamau.

O le tala sa faitauina, o lo o i ai i le taimi o le toe tu mai o Iesu Keriso mai le oti ma le tuugamau, ma ua faailoa i lona au so’o. O le faailoga o le leai o se masalosalo ma se toe faanenefu i le au so’o, e uiga ia Iesu Toetu, auā o lea ua vaai tino i ai, ma ua faamaonia, e moni lava ua toetu Iesu. Peita’i, ua lē o le faamamafa lea. O le mea o lo o faamamafaina, o le mana’o o Iesu toetu i le au so’o, ina ia o atu e tala’i atu le Tala Lelei i lona toetu mai i le lalolagi uma lava. E lē toe fesiligia la e le au so’o se faamaoniga, auā o lea ua pupula i ai o latou mata, ma ua vaai tino lava i le Tala Lelei ua aumai.

Ina ne’i fesili se tamaititi po o le a le Tala Lelei, ae pe aisea foi ua avea ai le toetu o Keriso mai le tuugamau e fai ma Tala Lelei. O le tali, e ao ona malamalama tamaiti, ua mafua ona avea le toetu manumalo o Iesu mai le oti ma le tuugamau e fai ma tala e lelei, ona o le taunuuga lea o le faaolataga na saunia e Iesu, mo le faaolaina o le tagata mai ana agasala. Ana le maluu ma toetu manumalo Iesu mai le oti ma le tuugamau, e leai se faaolataga mo le tagata.

GALUEGA FAATINO: FAATINOGA.

O lenei tala o se tala ua faalogo so’o i ai, ma o le tala e faamanatuina pea i tausaga uma, ma faalogoina pea i Aso Sa uma i le lauga a le faifeau, ma ua tele foi faatinoga ua faia i lea lava tala.

E lelei ona faatino le tala, a ia faamamafa lava le saunoaga a Iesu i lona au so’o, ina ia o atu e fai nuu uma ma so’o, ma tala’i atu le tala e lelei i le lalolagi.

PESE: Ta’u mai tala ia Iesu (Tell me the stories of Jesus)


A’OA’OGA:

1. Ia fiafia i le Tala Lelei.
2. Ia fai i tatou ma ave feau o le tala lelei, ae le o ave feau o isi tala faa-le-lelei.

TATALO.

Le Alii alofa o Iesu, fesoasoani mai lou Agaga ia'i matou, ina ia o matou fiafia e tala'i atu lou finagalo i le lalolagi. Ia e fa'aaogaina lo matou ola, e fai ma au ave feau i le lumana'i, Amene.

.....



“INA O ATU IA MA FAI NUU UMA MA SO’O O OUTOU”

TALA’I ATU LE LELEI, UA TOE TU IESU.

ASO SA: 29 NOVEMA 2015

MATAUPU: E MANUIA INA UA AVA MA FAALOGO I MATUA.

SINI: Ia a'oa'oina le vasega ina ia malamalama, i le manuia o le tama ma le teine e usita'i ma faalogo lelei i ona matua. (Tulafono e 5)

TUSI FAITAU: Efeso 6:1-4

FESOASOANI MO FAIAOGA:

“Nofo sa’o tamaiti ma mafaufau i le tulafono e lima (5). Tauloto faatasi mai le tulafono e lima. Lelei tele. Fai mai e a le tulafono e lima? Ioe! O lo o amata lava i le faatonuga e faapea, “Ia e ava, pe faapea foi, “Ia e faalogo ma usita’i i lou tamā ma lou tinā”. Faalogo lele la i le tatou tala, o lo o faamatala mai ai, le taua o le ava, po o le faalogo ma usita’i i le Atua”.

O le vaega muamua lava lea o le tusi a Paulo i le mataupu leni e ono, o lo o toe faamanatu ai e le aposetolo le tulafono muamua e uiga i le fanau ola usiusita’i i o latou matua. O le tusi atu a Paulo, e mo le Ekalesia i Efeso. O le faamanatu a Paulo i fanau, ina ia ava ma faalologo i o latou matua.

E leai lava se mea e tupu e aunoa ma se mafuaaga. Ua faalogo Paulo, ua ola le usiusita’i ma amio mataga nisi o fanau a le Ekalesia i Efeso, ona ua tele mea faafiafia ma tala’iga tau faasesē, ua tau au ina faaleagaina ai le soifua o fanau a le Ekalesia. O le ala lea ua toe faamanatu i ai e le aposetolo, le tulaga sa’o e tataua ona faatinoina e fanau, ina ia maua le manuia o lo o taoto i luma atu, o le ola tulu’i lea mai le Atua i luga o le laueleele. O lona uiga pe a toe faamatalaina le uiga loloto o le tulafono e lima (5) e pei ona i ai i le amataga, a fia ola umi ma manuia le tama ma le teine po o fanau, e leai lava se isi auala, ua na o le ava lava i matua ma mata’u i le Atua.

GALUEGA FAATINO: Tusiga Tusi

E manaia le faata’ita’i i tamaiti ona tusi le tusi. Ia tofu paga tamaiti, ma faia loa fetusia’iga. O Paulo le isi, a o le isi ia fai ma tama po o le teine, e na te faia se tusi e tali atu i ai iā Paulo, faafetai ia Paulo mo le faamanatu taua ua tuuina atu.

E taua foi le faata’ita’i o le vasega i lea auala o fesoota’iga sa fa’aaoga e tagata i aso ua mavae, ma ua lē o toe vaaia i nei Aso, talu le saasaoa o le atamai, ma telefoni feavea’i i nei ona po.

PESE: Ou te le toe faatali se’i o’u matua. (tusi pese aoga Aso Sa)

A’OA’OGA: (TOE FAAMANATU LE TULAFONO E LIMA)

TATALO.

Faafetai tele le Alii e, i lou faamanatu mai pea ia i matou, o le manuia matou te maua, ina ua matou ava i o matou matua, aemaise o lau Afio, Amene.

.....

MANATU TAIALA O TESEMA: O IESU LE FAAOLA. (Jesus is our Saviour)

O le afio mai o Iesu i le lalolagi, ina ia faaola le tagata ua pologa, talu le agasala ma le leaga. O lona uiga, ia nofo sauniuni tagata uma i lenei vaitau, e faamanatuina le Afio mai o Iesu i le lalolagi, i le Kerisimasi o lenei foi tausaga.

ASO SA: 6 TESEMA 2015

MATAUPU: UA SAILI E MAKOI LE TUPU.

SINI: Ia a’oa’o le vasega ina ia malamalama, o le taimi lava na iloa ai e Makoi le fetu i sasa’e, o le faailoga o se tupu ua fanau mai, tula’i loa ma saili.

TUSI FAITAU: Mataio 2:1-2

FESOASOANI MO FAIAOGA:

“O ai se tasi o ia iloaina, se mea taua o le a tupu i lenei foi masina? Sa’o lelei outou. O le Kerisimasi. Ae o le a la lene mea o le Kerisimasi? Ioe! E faamanatu ai le fanau mai o Iesu i le lalolagi. Toe fai faatasi le tatou mataupu, “**UA SAILI E MAKOI LE TUPU**”.

O Makoi o le faa-Samoaina lea o le upu Eleni o le “**magos**”. O loo faaliliuina i le gagana Peretania e faapea “wise men, sorcerer, astrologers”. O lona uiga pe a faamatalaina i le gagana Samoa, o tagata ia o ni tagata su’esu’e i fetu, o le la ma le masina. O le au faa-Saienisi, o lo o i ai le potu ma le atamai, e mafai ai ona o latou faitauina ni faailoilo o mea e tutupu, ma mea o le a tutupu, e pei la o le fetu sa o latou vaaia, ua uiga ese lona pupula mai le itu i Sasa’e, ma ua o latou faitauina, o le faailoga o le Tupu o tagata Iutaia ua fanau mai.

O le ala lea o lo latou saili, ina sei o latou ifo i lea tupu ua fanau mai. O le talitonuga o le au Makoi, ina ua vaaia le fetu pupula ese i le itu i Sasa’e o Ierusalema, na o latou faitauina, o le faailoga o le Mesia ua fanau mai, mai le laina o Tavita. O le isi lea ala ua mafua ai lava ona naunau e saili le mea o lo o i ai le pepe Tupu ua fanau mai, e ui o lo o fai Herota ma tupu o tagata Iutaia i lea vaitau.

O le fesili, pe aisea lava ua naunau ai le au Makoi e saili le mea o loo fanau mai ai le Tupu? Manatua foi le tala faasolopito o le nuu o le Atua, se ia oo lava ina vaeluaina ma faataapeapeina i le puleaga a le tele o isi malo sa i ai. O lea la o lo o matua faatalitali uma so o se tagata Iutaia ma so o se Israelu, i lo latou tupu ua faaigoina o le Mesia. O ia o le a afio mai ma le pelu e faatoilaloina ai o latou fili.

GALUEGA FAATINO: FA’AALIGA O MANATU.

O oe o se tasi o le au Makoi. Tusi mai ma faamatala mai sou lava lagona o oe o se tasi o le au Makoi, ina ua e vaaia se fetu e uiga ese lona pupula mai le itu i sasa’e o Ierusalema, ae pe aisea foi ua e naunau ai e saili le tupu o lo o faailoa mai e lea fetu.

PESE: PESE KERISIMASI (Na fanau mai i Peteleema....)

A’OA’OGA:

1. Fiafia ia Iesu.
2. E faaola mai le Alii ia i tatou.

TATALO:

Iesu Keriso lo matou Alii Faaola, o lau Afio lava o lo matou Tupu mamalu. Galue le Agaga o lau Afio i o matou loto, ina ia o matou saili lau Afio matou te ola ai e faavavau, Amene.

.....

UA VAAIA E LE AU MAKOI SE FETU UIGA ESE LONA PUPULA, MA UA LATOU SAILI I LE TUPU UA FANAU MAI



ASO SA: 13 TESEMA 2015

MATAUPU: E PAIA KERISO UA FANAU MAI.

SINI: Ia a'oa'o le vasega ina ia malamalama, o le Mesia ua fanau mai, o le Tupu paia.

TUSI FAITAU: Luka 2:25-32.

FESOASOANI MO FAIAOGA:

“O ai se tamaititi e iloa, o a foliga o le tagata e paia? Sa’o lelei le teine lea. O foliga o le tagata e paia tamiti, e filemu, e agamalu, e faamaoni, e faalogo ma usita’i. E fiafia i le Alii. So o se mea foi na te faia, e aulelei ma matagofie. O lona uiga la tamaiti, afai e le faalogo ma usita’i le tagata, pe mimita foi faatupu vevesi, ia pe ola foi i se olaga leaga, o le tagata la lena e le paia. Faalogo lelei la i le tatou tala, poo ai le tagata paia lea o le a tatou talanoa i ai.

O le fanau mai o Iesu i le lalolagi, na ui mai i le ala e pei ona masani ai le tagata i lona fanau mai. O le tulafono foi, o pepe fou uma faatoa fananau mai, e ao ona faapaiaina ina ia mautinoa le i ai i totonu o le sosaiete o le au Kerisiano. O le faamoemoe lea o le toeaina o Simeona sa faatalitali ai, ina ia ona iloa atu le Alii o Iesu Keriso, a o le i oti o Ia.

O Simeona, o le tagata amio Atua. Sa naunau lona loto i le fia vaai ma le fia sapaia o le pepe ua fanau mai, a o le i oti o ia, e pei ona musumusuina ai o ia e le Agaga Paia. Sa ia te ia le Agaga o le Alii, ma ta’ita’ina o ia i le malumalu, ae fetau loa ma le taunuu atu o Maria ma Iosefa ma le pepe o Iesu i le malumalu, ina ia faatino le faamamaina e tusa ma le tulafono. O le ala lea o le sapaia e Simeona o le pepe o Iesu, ma vivii atu i le Atua.

O le paia o le pepe ua fanau mai, e pei ona musumusuina ai le toeaina o Simeona. O le paia foi o Keriso ua fanau mai, e faigofie ona iloa e le tagata amiotonu faapei o le toeaina o Simeona.

GALUEGA FAATINO: TUSIGA ATA.

Tusi mai lava e le tamaititi ia le ata o le tala sa faamatalaina, ma ia taumafai e faamatalaina le ata ua ia tusiina.

PESE: O holy night (Le po paia) [Christmas song], Majesty (E Paia)

AOAOGA: *E lelei pea le fesiligia o le vasega i ni a'oa'oga ua o latou maua mai i le tala sa faamatalaina, ma ua faa-ata mai ia latou valivaliga.*

1. O Iesu o le Alo o le Atua ua afio mai i le lalolagi.
2. E silisili ese, e paia ma mamalu le tupu o Iesu ua fanau mai.
3. Ia paia o tatou olaga.

TATALO

Le Atua Paia e, faafetai i lou mamalu silisili ese, ua faailoa mai i lou Alo pele e to’atasi o Iesu, ua matou iloa ai lou Paia, e sili i mea uma lava, Amene.

**UA VIVI' I SIMEONA I LE ATUA, INA UA IA SI' IINA LE
PEPE O IESU.**



IA MANUIA LE KERISIMASI